







嘉興府志





史州碑尤相家志亦尚存焉

人物無數其地則

國朝奉正入清

祀冠州舊人

餘均屬而文之人

之矣志列何

尚庶尤屬

亦屬

嘉興府志卷五十

嘉興府知府善化許瑤光重輯




史列傳光邦家志列傳榮閭里上下異垂後同也禾中
人物淵藪兩廡典最鉅而

國朝雍正入清獻道光入宣公同治入楊園盛哉于志以崇
祀冠列傳人或非之然似亦倣孔子世家體茲循其舊
餘均彙而次之人傑也而地靈發之前範也而後進模
之矣志列傳

兩廡先儒

嘉興縣



唐

陸贄字敬輿嘉興縣人

舊唐書蘇州嘉興人唐書同至元志寶花寺在郡治西南二百步陸

宣公宅湯志宣公居城中甜瓜巷

曾祖齊望秘書監祖灞兵部郎中父

侃溧陽令贄年十八第進士中博學宏辭調鄭尉罷歸

壽州刺史張鎰有重名贄往見語三日奇之請為忘年

交既行餉錢百萬曰請為母夫人一日費贄不納止受

茶一串曰敢不承公之賜是歲以書判拔萃調渭南簿

遷監察御史德宗在東宮時素知贄名乃召為翰林學

士由祠部員外轉考功郎中朱泚之亂從幸奉天時車

駕播遷詔書旁午贄灑翰即成不復起草初若不經思

及成而奏無不曲盡事情中於機會嘗從容奏曰此時

詔書陛下宜痛自引過以感人心俾臣草辭無諱庶幾

羣盜革心德宗從之故行在詔書始下雖武人悍卒無

不揮涕感激

唐書本傳李抱真入朝為帝言陛下在奉天山南時赦令至山東士卒皆感泣思奮

臣是時知賊不足平議者謂與元是時賊未平德宗欲

戡難功雖爪牙宣力蓋贄有助焉明年遂改元乃議更益大號贄曰今乘輿播越大憝未

去陛下宜痛自貶勵不宜益美名以累謙德德宗從之

但改興元年號而已行在夾廡署瓊林大盈二庫別貯

貢物贄請悉出以賜有功德宗悟即撤其署李懷光有

異志李晟密言其變請移屯德宗遣贄見懷光議事贄

還奏懷光必反勸帝許晟移軍遣李建徽楊惠元與晟併屯東渭橋唐書本傳德宗曰卿所料極善然李晟移軍懷

光心已惆悵若更遣建徽惠元就東則使得為詞且俟

旬時晟至東渭橋不旬日懷光果奪兩節度兵建徽遁

而獲免惠元被執害之報至行在人情大恐移幸梁州

轉諫議大夫依前充翰林學士德宗還京轉中書舍人

學士如故初劉從一姜公輔等材不逮贊由下位建台

宰而贊孤立一意為左右權倖沮短又言事無所回諱

久之不得宰相母喪解官服除以權知兵部侍郎復召

為學士天下屬以為相而竇參素忌之贊亦數言參罪

失貞元七年罷學士以兵部侍郎知貢舉明年參黜乃

以中書侍郎同中書門下平章事舊唐書竇參傳參貶

參絹五千匹李異與參有隙遂具以聞德宗大怒欲殺

參陸贄曰竇參與臣無分因事怨望人之常情臣忝宰

衡合存公體以參罪犯置之於死恐用刑太過於是且

止乃再貶為驩州司馬參特為左右中官深怒謗沮不

已未至驩州賜死案舊唐書本傳云姜公輔于上前

間奏稱竇參嘗語臣云陛下怒臣未已德宗怒再貶參

竟殺之時議云公輔奏竇參語得之於贊參之死贊有

力焉此與參傳賜死之語既有舛異且如參傳則贊實

為之力救本傳所云與之相贊悉心報國以天下事為

背矣今取參傳而增辨于此

已任政不便于時者多所條奏德宗雖不能皆可而心頗重之戶部侍郎判度支裴延齡姦宄用事天下嫉之如讎以得幸于天子無敢言者贊獨以身當之屢於延

英面陳其不可累上疏極言其弊延齡日加譖毀十年

除太子賓客罷知政事唐書本傳班宏判度支卒官贊

君天下仇惡無敢言贊上書苦諫帝不聽俄而延齡姦倭得

客罷十一年春早邊軍芻粟不給具事論訴延齡言贊

與張滂李充等搖動軍情德宗怒將誅贊等四人會諫

議大夫陽城等極言論奏乃貶贊為忠州別駕裴延齡

領度支時陸贄秉政每於延英極論其誕妄不可令掌

財賦德宗以為非擯待延齡益厚贊上書疏其失德宗

不悅時鹽鐵轉運使張滂京兆尹李充司農卿李錡以

事相關皆證延齡矯妄德宗罷贄知政事滂充錡悉罷

職左遷十一年春久旱人情憂惴延齡遽上疏曰陸贄

李充等失權心懷怨望言度支多欠闕諸軍糧草以敷

怒軍情後數日神策軍人訴度支欠廩馬芻草上思延

齡言即下詔斥逐贄充滂錡等延齡方謀害在朝正直

之士會諫議大夫陽城等伏閣切諫事遂且止贄充等

雖已貶斥延齡憾之未已乃掩捕李充腹心吏張忠捶

掠楚痛令為之詞云前後隱沒官錢五十萬貫米麥稱

是其錢物多結托權勢充妻常於饋車中將金寶緡物

遺陸贄妻忠不勝楚毒竝依延齡教抑之辭其款忠妻

母于光順門投匭詎究詔御史臺推問事皆虛乃釋

唐書陽城傳德宗召拜諫議大夫居位八年人不能窺

其際及裴延齡誣逐陸贄等帝怒甚無敢言城聞曰吾

諫官不可令天子殺無罪大臣乃約拾遺王仲舒守延

英閣上疏極論延齡罪愆引誼申直贄等累日不止

帝大怒召宰相論抵城張萬福傳以列校征遼東有功累

得免敕宰相相論遣城等詣延英門論裴延齡事伏閣不

拜右金吾將軍陽城等測萬福大言曰國有直臣天下無

去帝震怒左右懼不測萬福大言曰國有直臣天下無

慮矣吾年八十與見後稍思之會辭延為刺史諭旨慰

盛事徧揖城等勞之

勞草舉數上表請贄代領劍南德宗猶銜之不肯與順

宗立召還詔未至卒年五十二贈兵部尚書諡曰宣始

贊入翰林年尚少以材幸天子常以輩行呼而不名翰苑集序扈從行在特所親信有時讌及出居艱阻之中雖語不以公卿指名但呼陸九而已

有宰臣而謀猷參決多出於贊故當時目為內相從幸山南道途艱險與相失一夕不至德宗喻軍士曰得贊者賞千金及輔政所言皆懇到深切或規其太過者對

曰吾上不負天子下不負所學違宅卹乎既放荒遠常闔戶人不識其面又避謗不著書地苦瘴癘祇為今古

集驗方五十篇示鄉人云子簡禮登進士第累辟使府兵部郎中唐會要貞元八年春中書侍郎平章事陸贄始復令吏部每年集選人舊事吏部每年集

人其後遂三數年一置選選人併至文書多不可尋勘真偽紛雜吏因得大為姦巧選人一蹉跌或十年不得

官而官之闕者或累歲無人贊命吏部分內外官員為三分計闕集人歲以為常其弊十去七八天下稱之舊唐書本傳初贄秉政貶駕部員外郎李吉甫為明州長史量移忠州刺史贄在忠州與吉甫相遇昆弟門人咸為贊憂而吉甫忻然厚禮都不銜前事以宰相禮事之贊初猶慙懼後乃深交時論以吉甫為長者韓愈與祠部陸員外書往者陸相公司貢士考文章甚詳愈時亦幸在得中而未始知陸之得人其後一二年前與及第者皆赫然有聲原其所由梁補闕肅王郎中礎佐之梁舉八人無有失者其餘則王皆與謀焉陸相之考文章甚詳也待梁與王如此不疑也梁與王舉人如此之當也至今以為美談獨異志崔羣知貢舉夫榜三十人豈非良田耶夫人曰君非陸贄相門生乎往年君掌文柄使人約其子簡禮不令就試如以君為良田即陸氏一莊荒矣

國朝道光六年奉

旨從祀孔子廟庭位列東廡先儒王通之次本傳

附

范新宣公故宅考或問曰史稱宣公蘇州嘉興人子生賢者之里亦知其故居之所在乎曰舊志稱陸齊望宅舍爲寶花寺是也或又曰記志所稱宣公宅亦多矣子何以定其在是也東萊宣公書院記謂秀州城東橋以宣公名者先老相傳公所生之地也林光氏志謂鶴渚在縣南二里宣公舊宅放鶴之所也又云仁壽寺西一里百福坊宣公故里也薛文清書院記謂城北有公遺廟世傳以爲公之故宅也許恂如百咏詩注今秀水治北甜瓜巷是宣公舊宅也嘉善志張涇匯之陸莊宣公

故居也又劉德夫思賢書院記謂縣實宣公故里也歷代言公宅者如此不一子將何所適從與曰吾以唐人之碑爲據耳放翁入蜀記云抵秀州遊寶花尼寺拜宣公祠祠有碑闕壞磨滅之餘時時可讀蘇州刺史于頔書大畧言秘書監陸公齊望始作尼寺於此其後灞漣澧兄弟又新之後又有賢妹字意者陸氏嘗有女爲尼云諱灞者宣公之父也夫于襄陽去宣公時近所書之記必可據至放翁以灞爲宣公之父則沿歐陽子宰相世系表之譌耳劉昫宣公傳云父偁深陽令是也且寶花爲宣公之宅可據者不獨于頔碑也宋淳祐間陸尙

書德輿報忠觀記曰昔余之上世有仕唐為秘書少監者嘗以宅為寺郡之寶華是也然則徐碩嘉禾志以府西南寶花為宣公宅者其言信有徵矣案此宅考應附古蹟宣公宅後因甜瓜巷屬秀水張溪匯屬嘉善而此宅考斷為嘉興舊志附傳後亦見宣公列嘉傳之確也

列傳

嘉興縣

漢

嚴忌吳人本姓莊避明帝諱稱嚴由拳人好詞賦吳王濞招致四方游士忌與鄒陽枚乘等俱仕吳以文辨著名久之吳王以太子事怨望陰有邪謀忌知不可說去之梁從孝王游號嚴夫子漢書鄒陽枚乘傳參趙圖記嚴助會稽吳人嚴夫子子或言族家子也郡舉賢良對策

百餘人武帝善助對獨擢助為中大夫是時朝廷多事上令助等與大臣辨論中外相應以義理之文大臣數

誦其尤親幸者東方朔枚舉嚴助吾邱壽王司馬相如而助最先進聞越圍東甌帝遣助以節發兵會稽浮海救東越未至閩越引兵罷後閩越復興兵擊南越南越守天子約不敢擅發兵上書以聞上多其義遣兩將軍將兵誅閩越閩越王弟餘善殺王以降漢兵罷乃令助諭意風指於南越南越即遣太子隨助入侍助與淮南王相結而還上大悅助侍燕從容上問助居鄉里時助對曰家貧爲友壻富人所辱上問所欲對願爲會稽太守於是拜爲會稽太守上書願奉三年最詔許因畱侍中有奇異輒使爲文作賦頌數十篇後淮南王反事與助相連上薄其罪欲勿誅廷尉張湯爭以爲不可助竟棄市

朱買臣字翁子吳人家貧好讀書常艾薪樵賣以給食擔束薪行且誦書其妻負戴相隨數止毋歌謳道中買臣愈益疾歌妻羞之求去後數歲買臣詣闕上書會邑子嚴助貴幸薦買臣召見說春秋楚辭帝悅之拜爲中大夫與助俱侍中是時方築朔方公孫宏諫上使買臣難詘宏後坐事免久之召待詔時東越數反覆買臣言發兵浮海席卷南行可破滅也上拜會稽太守會稽聞太守且至發民除道縣令竝送迎車百餘乘入吳界見其

故妻妻夫治道買臣駐車呼令後車載其夫妻到太守舍置園中給食之居一月妻自經死買臣乞其夫錢令葬悉召故人與飲食諸嘗有恩者皆報復焉居歲餘受詔將兵與橫海將軍韓說等擊破東越有功入為主爵都尉列於九卿數年坐法免復為丞相長史與御史大夫張湯有怨告湯陰事湯自殺上亦誅買臣子山拊官至右扶風

以上漢書本傳

徐栩字敬卿由拳人少為獄吏執法詳允遷小黃令時陳畱蝗野無青草過小黃飛逝不集刺史行部奏栩他事栩棄官蝗大至刺史媿謝令還舍蝗即遠去後為長沙

太守嘗食乾飯不發煙爨

吳中人物志參柳志

三國吳

朱桓字休穆吳郡人也孫權為將軍桓給事幕府除餘姚

長繼遷盜寇校尉丹陽鄱陽山賊蜂起桓督領諸將討

平之遷裨將軍封新城亭侯後代周泰為濡須督魏使

曹仁將步騎數萬向濡須時桓部兵五千人桓偃旗鼓

外示虛弱以誘致仁仁遣其子泰攻濡須城分遣將軍

常雕督諸葛虔王雙等乘油船別襲中洲桓力拒之泰

燒營而退遂梟雕生擒雙封嘉興侯桓輕財貴義愛養

吏士瞻護六親俸祿產業皆與其分卒子異祠

吳志本傳

朱異字季文以父任除郎後拜騎都尉代桓領兵隨朱然
 攻魏樊城建計破其外圍拜偏將軍遷揚武將軍孫權
 與論攻戰辭對稱意權謂異從父驃騎將軍據曰素知
 季文名見之復過所聞文欽詐降密書與異欲令自迎
 異表呈欽書因陳其偽不可信遷鎮南將軍魏遣胡遵
 諸葛誕等出東興異督水軍攻浮梁壞之魏軍大破假
 節為大都督救壽春圍不解還軍為孫綝所枉害

吳志本傳

唐

陸元朗字德明以字行善言名理陳後主為太子集名儒
 入講承光殿祭酒徐孝克倚貴縱辨眾多下之德明始

冠于下坐申答屢奪其說釋褐始興國左常侍隋煬帝
 擢秘書學士遷國子助教王世充僭號封子元恕為漢
 王以德明為師即其廬行束脩禮德明恥之遂移病去
 世充平秦王辟為文學館學士補太學博士高祖已釋
 奠召博士徐文遠等各講經德明隨方立義徧析其要
 帝大喜曰三人者誠辨然德明一舉輒蔽可謂賢矣賜
 帛五十匹遷國子博士封吳縣男卒論撰甚多傳於世
 子敦信檢校右相累封嘉興縣子敦信子齊望秘書少
 監齊望子灞吏部郎中灞子侃溧陽尉

唐書本傳參趙圖記

陸元方字希仲陳給事黃門侍郎琛之曾孫明經後舉八

科皆中累轉監察御史武后時除殿中侍御史擢鳳閣舍人遷鸞臺侍郎坐封會李昭德貶綏州刺史擢天官侍郎兼司衛卿或言其薦引皆親黨后怒免官令白衣領職元方薦人如初后召讓之對曰舉臣所知不暇問仇黨又薦其友崔元暉有宰相才后知無他復拜鸞臺侍郎同平章事后嘗問外事對曰臣備位宰相大事當白奏民間碎務不敢以聞忤旨下除太子右庶子進文昌左丞卒贈越州都督元方素清慎再執政每進退羣臣后必先訪問外秘莫知臨終取奏藁焚之曰吾陰德在人後當有興者諸子皆美才象先景情景融尤知名

陸象先字崇賢舉制科高第爲揚州參軍事擢洛陽尉遷監察御史累授中書侍郎進同中書門下平章事初太平公主謀引崔湜爲宰相湜曰象先人望宜幹樞近湜敢辭主不得已爲言之遂竝知政事公主旣擅權宰相爭附之象先未嘗往謁及謀逆召宰相議曰甯王長不當廢嫡立庶象先曰帝得立何也主曰帝有一時功今失德安可不廢對曰立以功者廢必以罪今不聞天子過失安得廢主怒更與竇懷貞等誅卒誅死以保護功封兗國公初難作睿宗御承天樓羣臣稍集帝麾曰助朕者畱不助者去于是有投名自驗者事平元宗得所

投名詔象先收案象先悉焚之帝大怒頓首謝曰赴君之難忠也陛下方以德化天下奈何殺行義之人故臣違命安反側者其敢逃死帝悟善之罷為益州大都督府長史劍南按察使累徙蒲州刺史兼河東按察使入為太子詹事歷遷太子少保卒年七十二贈尚書左丞諡文貞

陸景倩象先弟為扶溝丞時河南按察使畢構覆州縣殿最欲必得實有吏言狀曰某疆清某詐清惟景倩曰真清終監察御史

陸景融長七尺美姿質寬中而厚外博學工筆札以蔭補

千牛轉新鄭令政有風績累遷工部尚書東京留守卒

贈廣陵郡都督景融于象先先後母弟也象先被笞景

融諫不入則自楚母為損威人多其友愛以上唐書本傳

徐岱字處仁蘇州嘉興人農家子岱好學六籍諸子悉所

探究問無不通難莫能詘轉運使劉晏表薦為校書郎

浙西觀察使李栖筠欽其賢署所居為復禮鄉擢河南

偃師尉禮儀使蔣鎮薦為太常博士改膳部員外郎遷

水部郎中充皇太子侍讀尋改司封郎中擢給事中兼

史館修撰竝仍侍讀兩宮恩遇無比而謹慎過甚未嘗

洩禁中語亦不談人之短甥姪遺孤者婚嫁之卒贈禮

部尚書 參新舊唐書

朱巨川字德元嘉興人年二十明經擢第尋以賢能舉授

左衛率府兵曹參軍改睦州錄事參軍授監察殿中等

御史薦左補闕內供奉擢起居舍人知制誥拜中書舍

人凡載書之傳信者贊書之加命者詔策之封崇者愍

策之褒厚者其辭必溫其道必直洪而不放纖而不繁

以建中四年邁疾終年五十九 文苑英華李紆墓銘

殷堯藩元和九年進士從李翱長沙幕府後為長樂令有

治績擢侍御史官江南甚著風采有詩集一卷 趙圖記

陸展字祥文贊族孫客於陝遂為陝人光啟二年進士第

累進翰林學士中書舍人展屬辭敏速一時書命同僚

自以為不及昭宗嘗作賦詔學士皆和獨展最先就帝

覽之嘆曰貞元時陸贄吳通元兄弟善內廷文書後無

繼者今朕得之累為尚書左丞封嘉興縣男徙戶部侍

郎同中書門下平章事覃王以兵伐鳳翔展極諫帝責

展沮撓貶峽州刺史師果敗授工部尚書封吳郡公從

遷洛柳璨附朱全忠謀去朝廷衣冠有望者貶展濮州

司戶參軍殺之白馬驛 新唐書本傳

陸明允字信夫贄從子元和三年以集賢校理出為奉化

令歲大旱鄰境人相食明允輯和其民振廩食以賑餓

者全活數萬人治行為天下第一復於龍潭涇疊石障水鑿渠引流下通廣平湖達于江溉田數千頃後名其堰曰資國渠曰新河至今賴之在邑五年卒民祠之嘉興志

湯志

宋

聞人建字端木曾祖珪字廷輝仕吳越為新定從事累官御史中丞兼國子監祭酒自珪以上居錢塘三世矣珪子新周顯德四年始遷嘉禾遂葬於城外竹橋之西新不仕好藏古書嘗戒諸子曰吾家以儒業奮汝曹當服勤以善守之新子泰大理寺評事二子長即建也舉進

士歷道婺兩州推官遷著作郎騎都尉監秀州都鹽倉轉秘書丞以子貴加贈尚書有熙寧三年四月敕藏於

家載家譜

秀州自錢氏歸國未有顯於朝者惟大中祥符

五年有聞人侃登徐爽榜甲科至天禧三年建復登王整榜甲科始為鄉里倡而聞人氏奕世簪纓不絕江左稱望族今秀水縣北聞家湖蓋因姓得名也墓在桃花原孫沔撰銘子安壽字景仁安世字漢卿越州主簿安易以子璩貴贈大中大夫宋聞人氏家譜及徐一夔所撰聞人氏譜序參至元志趙

圖記并嘉興湯志

聞人安道字夔庚寶元元年進士博覽羣書言行為鄉里

師法嘗監睦州酒稅趙清獻為守知其賢與定交後清獻移漕梓益安道從之官於蜀之新津清獻特遷之成都及罷蜀唯取石經數本以歸通判歙州時方行青苗錢散及萬緡則月加俸錢十千安道散至九千緡而止曰吾不能去官然亦不願加俸歷官職方郎中知南康軍有僧了元交結權貴安道斥之了元憤日伺安道所為時州郡少事安道暇日嘗領官屬游寺飲酒賦詩乃以不事事謗之遂罷歸與司馬溫公同榜相知最深又與東坡詩筒往來見於紀錄至元志參聞人家譜

陳舜俞字令舉博學彊記應材識茂異賢良方正直言極

諫制科擢第一是時舜俞已登進士乙科復中是選文章聲名赫然在人上始授光祿丞簽書壽州判官以屯田員外郎宰山陰秩未滿召試館職不就青苗法行不奉令上疏自劾責監南康軍鹽酒稅在貶所與太傅劉凝之跨雙犢窮泉石之勝後歸嘗乘白牛往來溪上自號白牛居士鄉人名其居曰清風涇及卒蘇軾稱其學術才能兼百人之器慨然將以身任天下之事而一斥不復士大夫識與不識皆深悉之著有都官集三十卷

廬山記五卷行世宋史本傳參至元志

案舜俞史稱湖州烏程人居秀之白牛村攷文獻通考方輿勝覽至元志諸書俱作嘉興人嘉興治東北一里

嘉興府志 卷五十一
為舜俞宅崇甯三年孫某捨之為漏澤寺其隱居在清風涇有陳賢良祠後析屬嘉善則舜俞本籍嘉興鑿鑿可據又攷韋居安梅磻詩話亦稱嘉禾人韋宋末吳興人足證史傳之誤

聞人瑛字君儀以詞學擅名登熙甯三年申科初任鎮江金壇簿歷官忠正軍節推致仕所得祿盡與子姪生平不具緘鑰不畜一物讀書為文至老不衰有家集二十

卷
嘉興
湯志

聞人宏字君度朝散大夫安遠子大觀己丑進士授通州司法陳瓘貶台州宏願從游乞改天台兵曹後知宣城有善政卒判常州所著文集十卷中興要覽十卷周官通解十卷經史旁闡十六卷
柳志

王子武初為統軍睦寇方臘作亂來攻秀州去城一舍而陣眾號十萬子武白太守曰今日之政公職守子武職戰請背城借一以報國乃簡精銳五百人長兵在前短兵在後弓矢分左右翼夾射啟門鼓譟而出太守率百姓登陴插鼓發喊以助之戰士勇氣百倍以一當百賊大駭奔潰數十里斬首五千級築京觀以表其功賊遂退不敢北向以窺江淮者由子武以孤軍遏之之力也

兩浙名
賢錄

董將紹興間以左朝請大夫守真州初廟學燬於兵火權寓城南將至始遷還舊址文廟齋舍乃克備
嘉興
湯志

魯館紹興間任鹽官令諸司列薦任滿除主官誥院宰海

昌遇水旱館力轉上聞得太倉粟二萬斛實行荒政明

年春疫作館命醫徧藥且施以粥全活甚眾其疫死者

作叢塚瘞之鏘其姓名於石使其家得訪而識焉袁志

章元振紹興中進士知肇慶府改廣東提舉與秦檜同登

第甘於遠宦未嘗以私干檜萬曆廣東通志

婁機字彥發乾道二年進士授鹽官尉調含山主簿遷太

常博士秘書郎請續編中興館閣書目又請寬恤淮浙

被早州縣擢監察御史韓侂胄議開邊機謂恢復之名

非不美今士卒驕逸財力未裕萬一兵連禍結奈何侂

胄不悅詔遣宣諭荆襄機昌言曰使往慰安人情則可

必欲開邊啟釁有死不能從遂以言去侂胄誅召為吏

部侍郎禮部尚書擢同知樞密院事進參知政事彌縫

裨贊尤惜名器守法度進退人物直言可否數上章告

老以資政殿學士知福州力辭提舉洞霄宮以歸年七

十九卒贈金紫光祿大夫加贈特進所著班馬字類廣

干祿字編尤深書學流傳尺牘人多藏弄云宋史本傳

衛涇字叔清其先齊人唐末居秀州淳熙間孝宗親擢進

士第一歷起居舍人直煥章閣知慶元府時權姦用事

十年不調開禧初召官吏部尚書拜御史中丞請誅韓

侂胄論罷右相陳自強拜參知政事侂胄伏誅又患史彌遠欲去之彌遠乃諷御史劾罷涇知揚州除資政殿學士致仕卒贈太師追封秦國公諡文節侂胄嘗指朱子偽學及誅諸召熹還朝已卒涇乃取諸經四書傳注刊布之所著文章奏議五十卷曰後樂集

衛湜字正叔涇弟好古博學集禮記諸家傳注為集說凡

一百六十卷上之朝官至寶謨閣知袁州學者稱樸齋

先生以上趙圖記

陳洙少貢上庠屢魁多士道君皇帝覽其試卷歎曰陳洙試卷首尾俱新育才既久今見偉人令鉛山隆興七年

上遣御史劉大中仗節宣諭察吏賢否至鉛山廉得洙

戢吏撫民清廉果斷上其狀下詔褒之袁志

王希呂字仲行本宿州人南渡後居嘉興乾道五年登進

士科召試授秘書省正字除右正言時張說以攀援戚

屬擢用再除簽書樞密院事希呂與侍御史李衡交章

劾之上疑其合黨邀名責遠小監當既而悔之改授宮

觀方說之見用氣勢顯赫後省不書黃學士院不草詔

皆相繼斥逐而希呂復以身任怨去國之日屏徒御躡

履以行由是直聲聞於遠邇雖以此黜亦以此見知出

知廬州除吏部員外郎尋除起居郎兼中書舍人淮右

擇帥上以希呂已試有功令知廬州兼安撫使修葺城
 守安集流散兵民賴之加直寶文閣江西轉運副使召
 為起居郎除中書舍人給事中轉兵部尚書改吏部尚
 書求去乃除端明殿大學士知紹興府尋以言者落職
 天性剛勁遇利害無回護意惟是之從嘗論近習用事
 語極切至上變色欲起希呂挽御衣曰非但臣能言之
 侍從臺諫皆有文字來矣佐漕江西嘗作拳石記以示
 僚屬一幕官舉筆塗數字舉坐駭愕希呂覽之喜其不
 阿薦之居官廉潔至無屋可廬由紹興歸猶寓僧寺上
 聞賜錢造第時人名其所居里曰聽履坊

宋史本傳
參至元志

沈揆字虞卿進士淳熙六年守台郡人號儒者之政累擢

祕書監祕閣修撰江東運副光宗即位以國子祭酒召

尋被命使金還守吳郡紹熙四年除司農卿權吏部侍

郎周必大稱其殫見洽聞與尤袤齊名

台州府志參
曝書亭集

錢汝淳熙中為昌化令興學勸農政績茂著與故令錢冰

卞圍齊名百姓皆愛戴之

林至淳熙間進士師事朱文公仕為建甯教授

以上
圖記

莫澤字潤卿嘉定九年為旌德令新淳源橋上流築二軟

陂登石成岸以殺水勢李延中為之記

嘉興
湯志

沈炎字若晦寶慶丙戌進士累官端明殿學士同知樞密

院事兼權參知政事提舉洞霄宮進大學士致仕卒贈少保炎居言路嘗按劾福建轉運使高斯得觀文殿學士李曾伯等又論罷左丞相吳潛右丞相丁大全及其

黨與柳志

李景勉字懋之理宗紹定間由上庠解褐立朝靖共于邊事尤曉暢以太常丞守臨汀卒至元志

焦炳炎字濟甫先世宣州人祖虎臣寓居嘉興炳炎於理宗朝擢右科淳祐辛丑舉進士第三人為諫官論奏累數百上時宰主括田議炳炎痛疏其害面奏懇惻上為動容然未有寢命炳炎論愈力時宰語人曰渠非攻田

實攻我也尋除太常少卿疏辭以右文殿修撰致仕弟

煥炎字晦父紹定間進士慷慨有大志仕至鎮江守兄

弟稱二焦云兩浙名賢錄參趙圖記

案炳炎中淳祐元年徐儼夫榜見至元志又方輿勝覽秀州有宋殿帥焦虎臣園遺址在郡城趙圖記載炳炎兄弟為虎臣孫則焦氏居是邦累世矣其云本宣州人者特追敘先世之本貫耳舊志列入流寓今改正

林子善字常甫淳祐間登進士第鄉里稱純儒守永州改

淮西制參卒至元志

朱張恂字宗厚七歲讀經史成誦十五能屬文試入上選

為省元有聲以征廣蠻功遷信義校尉時車駕避元兵於匡山恂率舟師勤王力戰多所斬獲會風雨大作與

樞密陸秀夫同日溺海死子穹壽天任奉父衣冠葬之

袁志

元

姜復昌任崑山州判官時津助法行與省官覈產程役寬

免單窶州人愛戴之秩滿將行聞民欲致餞抵夜潛出

州境 吳中人物志 參趙圖記

俞庸字子中為平江路推官年饑穀貴憲府檄庸董倉庾

賑給全活數萬淮兵壓境庸募勇士守盤門郡僚高安

等謂庸盍俱竄庸厲聲曰公等以世臣守大城一旦臨

利害先民以逃不顧義與恩耶安持鐵簡擊庸仆地遂

開門兵至庸未甦被擒尋以計脫去微服間道歸久之

太守知其事將授之爵庸謝曰吳門之役吾有死所今

日之生出不幸耳尚負面受他命見天日耶發憤病卒

子俊工詩負氣凌轢不可一世 趙圖記參 橋李詩繫

項衢字伯道冠子仕元淮西廉訪副使曾孫邦字景亮為

明弟子員升太學授孝感縣丞多惠政以才堪治劇調

吳江俸贖友人子于妓籍歸囊無長物以孫忠貴贈官

嘉興 湯志

潘澤民名著以字行本大梁人宋南渡占籍嘉興幼失父

鞠於伯兄俾習吏事澤民曰家世業儒吏非吾習也中

鄉試備榜補吳郡甫里書院直學游京師以薦爲中書省從事後辟吳興郡幕辭乃留主郡學其講道設教悉取法胡安定再辟浙東元帥府史使海甯行御史臺留爲掾卒有晏集詩心性論行世袁志

楊樞字伯機大德五年至西洋遇親王合贊遣使臣那懷等如京師遂載以來朝貢畢仍以樞護送西還授忠顯校尉海運副千戶乃至其登陸處曰忽魯謨斯往來歷五年凡舟楫糗糧物器之類一出於己致疾歸泰定四年起爲昭信校尉常熟江陰等處海運副千戶給慶紹温台漕輓之直力剗宿蠹培剋之弊陞松江嘉定等處

海運千戶卒黃潛楊樞墓志

陸文英至正間尹邵武政浹民和嘗重新廟學袁志

黃中玉以父蔭授江山縣尉時海內鼎沸詔徙行臺於紹興以控制閩越至正丁酉擢玉爲參謀統鄉兵守衢越二年城陷遇害一門十五人皆沒長子孟輔出而僅免貝瓊黃中玉哀辭序

明

金綱字子尙元至正間與張翼俱以龍門賦舉鄉試洪武初以薦舉歷知蘇州時百姓苦官民田則輕重不齊里胥易爲姦綱上疏請減重額先是張士誠據吳太祖屢

嘉興府志 卷五十一
攻之不下怒其民爲之守故張氏滅獨加三吳賦稅綱

疏入逢上怒得罪賜死至宣德朝知府況鍾始爲奏減

人追思之子穎伯從武林俞紫芝游遠于經學袁志參蘇州府

志盛楓嘉禾徵獻錄

陳俊民有才行洪武中求人才徵至京授山東布政司理

問永樂初擢刑部員外郎歷陞貴州參政終右布政撫

綏軍民邊鄙賴之趙圖記

顧光遠本嘉定人遭亂居嘉興元末以材辟爲京口掾太

祖下江南授江西行省理問遷知龍陽州改知泰和時

亂久麓定民好訟前守禁之光遠至集訟者出榜誨諭

之民來觀不訟而去者十之一使訟者居譙樓靜思三

日然後訴有不欲終訟者自罷去又過半于是擇吏置

簿受訟詞而勾稽之兩月而訟清諸吏畏服毋敢舞文

者境有虎光遠草檄告神虎遁去歷廣東行省郎中召

入拜吳王府副相坐累逮繫卒嘉興何志參嘉禾徵獻錄

王貞字貞德洪武開科鄉舉授合水知縣治有聲調在平

邑當衝要疲於供應節省諸費以蘇民困坐註誤左遷

尋召拜監察御史趙圖記

王嘉會字原禮洪武初詔舉明經之士嘉會應聘賦詩稱

旨試其文復賞異之除翰林院檢討陞國子監右司業

時太學方新肄業者常數千人宋訥爲祭酒與嘉會嚴立規範月旦程課井井有法至今仰其師表

趙圖記參分省人物

徐中字伯庸洪武初應明經薦授鄱陽河泊所大使晚歸

里以尙書教授鄉人性質直言行不苟有詩文集

袁志

沈章字叔昂洪武初以部掾知南康縣廉勤有爲憫民病

涉爲建通濟橋區畫有方民爭趨之卒以成功

南康府志

夏鳳祥洪武中以薦辟知邵武縣嘗曰廉爲士之大節居官而不能廉大節虧矣雖有政事何足尙及代去囊橐

蕭然

福建通志

沈鑑字孟鈞洪武中以鄉貢入國學授北平按察司僉事

左遷閩縣尉勤慎愛民宣德初復遷福建僉事歷轉福

建右參政持守如一日

袁志參嘉禾徵獻錄

王軫

一作真

本德清人居嘉興父升元末以遺逸應詔授德

興尉不赴軫中洪武開科鄉試授平涼崇信縣升嘗寓

書於軫助其清心潔己以廉自守會太祖得升書下詔

褒美擢軫爲刑部員外郎特賜升銀絹稱爲老賢人云

嘉禾徵獻錄

錢鈞字志衡洪武中以明經授本府學訓導廣東參議喻

良奉命治水按郡與鈞講求水利籌畫頗多後以疾辭

扁舟放浪自號小西湖漁者有半隱集構李詩繫

鄒濟字汝舟事母以孝聞博學強記尤長春秋為餘杭訓

導遂寄籍焉累遷國子學錄助教以薦知平度州除禮

部郎中征安南從幕府司奏記還為廣東右參政再遷

左春坊庶子授皇孫經進少詹事當時宮僚多得罪徐

善述王汝玉馬京梁潛輩被讒相繼下獄死濟積憂得

疾皇太子以書慰曰卿善自攝即有不諱當提攜卿恩

不使墜蓬蒿也卒年六十八洪熙元年贈太子少保諡

文敏命有司立祠墓側春秋祀之明史有傳

案吳志有以本貫寄籍他省者別立舊籍一門如宋魯館明鄒濟前編嚴清吳國倫諸人考吳志以前無其例

況惟嘉興一縣有之今刪去此門寄籍者即于本傳著之

楊任洪武間由人才擢知袁州黃子澄一見以國士許之

靖難兵起引疾歸子澄出徵兵往約蘇守姚善航海善

不可子澄乃至任家其謀大事事泄任與子澄俱被執

至京磔于市子禮亦坐死時有袁杞山亦謀匡復事敗

至吳江自沈于水有吳貴三出之復免分省人物考參吳志

姚瑄洪武丁卯鄉舉革除中為御史靖難師入死之吳志

李文榮洪武末以貢授萬安知縣入為太僕寺丞因事謫

戍京衛太宗欲察人情向背時出巡文榮上言以京城

空虛恐生不測守禦宜嚴監國是之悉錄京城壯丁防

守命文榮統之太宗回鑾大喜詢知計出文榮擢福建
布政司參議賜奉天征討鐵牌一面部內寇發隨宜誅

勳引年歸嘉禾徵
錄

案同時江西亦有參議李文榮犯大辟太宗以同名姓
疑之特命原赦法官執其非竟免死見袁志及嘉禾徵
錄

尤夔字堯卿洪武中孝廉永樂初授睢陽丞攝縣事蝗移

傍邑傍邑以其縱入也移文讓之夔反牘曰蝗蝻非家

畜敝邑豈能縱之夔若不德蝗當復至敢讓鄰耶傍邑

媿服趙圖
記

朱冕字日章永樂間鄉貢崑山教諭經學舉業皆有師承

課子弟勤而嚴多所成就至今稱善教者必曰冕尋遷

鎮海衛學教授劉
志

鈕正以從靖難功厯官留守衛指揮袁
志

嚴貞一作
真字養正以進士知景陵縣廉介有為孜孜惠愛

百姓為立生祠趙圖
記

案題名碑作嚴貞
永樂甲申進士

龐敬正統中知廬田嚴明廉介壇壝舖舍祠廟皆其建置

一時賢令稱敬為最袁
志

俞山字積之以乙榜為崑山訓導改郕府伴讀景泰初以

藩邸舊臣進鴻臚少卿陞吏部侍郎時議迎復同列頗

有難者山奮然曰鑾輿復然後人心悅而天下安況天
倫所係至重力贊之朝廷知山清慎作歲寒圖題詩賜
之懷獻太子立加太子少傅入閣預機務固辭守本官
命同尚書王直每日經筵更番侍直進太子太傅初易
儲時山密諫不聽退而憂曰禍基自此始矣至是益不
安累疏乞骸骨給官舟以歸囊橐蕭然里居假貸以自
給山爲人質直而遇事善諷諫在邸邸日書大學衍義
尚書毛詩及聖學心法等書進說其佐銓衡薦擢不求
人知請謁必峻拒臺諫有以持正忤權倖者必曲爲調
護爲文據經史詩歌清麗善大篆榜書及畫梅著有梅

莊集子誥字汝欽以蔭爲工科給事中出判沂州遷南

康知府明史參鄒志
嘉禾徵獻錄

諸忠永樂間判饒州府事以才能擅名於時被薦入爲郎

中嘉興
湯志

沈淳字惟厚以進士授刑部主事陞吏部員外郎致仕淳

少讀書精舍有鄰女夜奔堅拒不亂其外和內介類此

著有拙庵集柳志

鄒幹字宗盛濟子成祖得異夢問諸臣有舉子者乎濟奏

生子成祖喜遣充應天府學生賜鈔二千貫月給米二

石景帝初以進士由兵部郎中超擢本部右侍郎以才

爲于謙所倚也先入寇九門皆閉百姓求入幹開門納之尋改禮部兼巡視河南鳳陽水災與王竑請賑又請令諸生輸粟入監讀書納粟入監自此始再遷禮部尙書乞休馳驛歸仍命有司月給米浙江歲饑具疏奏聞孝宗嘉其憂民敕有司備羊酒勞之比至而幹已卒贈太子太保諡康靖

明史本傳參嘉禾徵獻錄

姚綬字公綬少工古文詞以進士官廣東道監察御史巡

按兩淮鉤剔積弊歲饑畫策賑濟流民賴以全活璽書褒美後謫知永甯縣以母老辭歸居大雲里饒水竹作室曰丹邱又作滄江虹月舟游泛吳越間書畫妙絕一時詩文暢逸著有天人合旨十卷姚侍御詩文二十卷

趙圖記參鄒志分省人物考

支立字中夫事母以孝聞以鄉舉爲常州府教授充順天同考官時大璫汪直於途次投千金欲薦其姪立以狀白當事入闈檢其卷抹去名大震遷翰林院孔目與羅倫姚綬相友善敦務本爲己之學博通諸經妙于講解時號支五經子高亦知名

橋李詩繫參嘉禾徵獻錄

伍方字公矩以進士知武岡州州爲苗賊殘破國賦無出上臺督徵甚急方疏請蠲貸竟得旨民始復業粵蠻寇擾防禦有功以誑誤戍柳州遇赦歸創西圃草堂以詩

史自娛著有柳庵集袁志

戈瑄字良玉祖其卿洪武間舉賢良授嘉禾遞運使因占

籍瑄以進士知嵩縣邑多逋賦礦徒竊發瑄寬徭役緩

追呼數年逋盡償礦患亦息擢御史疏論萬貴妃怙寵

不法廷杖尋巡按南畿歷浙江江西布政使陞副都御

史立法嚴明不奪權勢時劉瑾專政怒不附己追論浙

藩事罰米乞休不允改大理卿以南刑部尚書致仕歸

嘉禾徵
獻錄

包鼎字汝調與弟鼐同舉進士授兵部主事歷陞郎中乞

改南部出知池州性情退未老乞休孫節孝自有傳汴

以進士歷刑部郎中出為四川參議均賦戢亂頗著茂

績袁志參嘉
禾徵獻錄

陳良字明遇以進士授推官操履廉潔在任五年始終一

致卒於官家無餘貲嘉興
湯志

尚縉字美儀本嘉興人成於睢遂為睢人與兄綱俱以進

士為兵部主事縉調刑部有明決聲孝宗立命錄畿內

囚平反甚眾擢知臨江府會與五府爭樟樹鎮稅課鎮

稅雖歸臨江而諸郡日囂縉抗疏解綬去著有江西通

志水南豪睢州志諸書袁志

顧節宏治中以歲貢知翁源值歲饑聞於上官民獲賑給

邑之羊逕山高路隘盜所伏大為民害節治為坦途民便之袁志

李儒字宗文其先嘉興人徙華亭正德辛未中會試引疾歸甲戌第進士又謝疾去嘉靖改元詔起恬退之士始

就選為建甯推官擢南主事轉刑部郎中請老歸生平淡泊寡營自建甯歸惟殘書數卷而已嘉禾徵錄

陶炳字明德世襲海甯衛左所百戶工騎射所佩劍時有光怪人異之正德初以將才舉陞本衛正千戶顏其堂

曰瑞劍袁志參徵錄

譚諫博學篤志正德間以明經謁選司選者諫門下士也

欲授以泉州判力辭授南京光祿署正四方從游之士

甚眾卒於官貧無以殮門人襄其事孫昌言別有傳袁志

王經字伯常以舉人知四川漢州州當孔道舊飭厨傳候之三十里外經至罷不復設蜀中民糧折輸什九則額

繁多經請均其則而斂之他如建舫渡成輿梁勸民植

蠟樹以興利忤時左調不赴歸嘉禾徵錄

包節字元達先世嘉興人其父始遷華亭節以進士授東

昌推官入為御史劾兵部尚書張瓚貪穢出按雲南時

仕者以荒微憚不欲往因設告就遠方之法節言此曹

志甘投荒非年迫衰遲則家貧急祿志在為己豈在恤

民請自今以附近選人充之而州縣佐貳始用此曹吏部請以節言概行於雲貴兩廣制可以疾歸起故官再按湖廣顯陵守備中官廖斌擅威福節欲繩之語先洩斌俟節謁陵時故獻膳羞遽使撤去詭稱節麾出之鍾祥民王憲告斌黨庇姦豪周章等節捕章斃之杖下斌益怒遂奏節不以正旦謁陵次日始謁時當進膳不旁立褻慢大不敬奏已入節始奏斌前事帝大怒以節抵罪逮詣詔獄永成莊浪衛莊浪極邊敗屋頽垣節處之甚安獨念其母自傷不克終養日飲泣母訃至晝夜哭又聞弟孝卒撫膺曰誰代吾奉祀者哭益悲病死遺言

以衰絰殮明史本傳

包孝字元愛後節三年成進士由中書舍人為南京御史疏論禮部尚書溫仁和主辛丑會試有姦弊且劾庶子童承敘贊善邵希賢編修袁燁帝皆不問未幾又劾巡撫孫禮吳瀚翰罷去孝兄弟分居南北臺竝著風采又皆有至情節官北不得養母孝遂以侍養歸母亡哀毀骨立未終喪卒節亦繼殞時竝稱其孝明史本傳
案嘉禾徵獻錄載孝又疏劾嚴嵩不法事將得罪適上禱元夢中似聞有愛惜人才之語明日疏上帝手批云包孝是人才免究舉朝皆莫測其意史傳不載附錄於此
周惠字世仁嘉靖初仕兵馬指揮有李變者殺人潛逸民

挾怨誣證成獄惠疑之卒抵欒罪以才遷辰州判地當
黔衝驛政飢餓惠整飭逾月積弊頓革以勞卒於官

吳志

參徵
獻錄

陳所蘊字道行嚴嵩未第時旅行厄盜所蘊父倫為具貲

裝送歸後分宜柄國欲修先德議以內閣典籤酬所蘊

所蘊固卻之分宜敗乃謁選主詔安簿能聲最著

恬致
堂集

嚴清字公直其先嘉興人正
德間徙雲南嘉靖二十三年進士除富順

知縣入為工部主事歷郎中連丁內外艱服除補兵部

擢保定知府故事歲籍民充京師庫役清罷之歷遷易

州副使陝西參政四川按察使右布政使竝以清望薦

以右僉都御史巡撫貴州未上改四川清久官川中僚

吏憚其來相率厲名行少墨敗者陝西賊流入境巡按

御史王廷瞻劾清縱寇大學士趙貞吉言賊起即陝沿

害川徼即有罪當罪守土臣不宜專責巡撫臣蜀人深

知清約己愛人省事任怨今方倚清如父母奈何棄之

疏奏不允命解官聽調起撫山西未赴改貴州歷南京

大理卿三遷刑部尚書張居正當國尚書不附麗者獨

清居正卒籍馮保家得廷臣餽遺籍獨無清名神宗深

重焉會吏部尚書梁夢龍罷即以清代日討故實辨官

材自丞佐下皆親署無倖進者甫半歲得疾躑帝數問

閣臣嚴尙書病愈否十五年兵部缺尙書用楊博故事特詔起補而清疾益甚不能赴卒贈太子太保諡恭肅

明史本傳

案清先世名秋蟾者宋澹咸間居郡之竹林庵善醫見藝術父錖亦知醫正德間徙雲南遂以雲南籍中嘉靖癸卯鄉試故史傳作雲南後衛人其祖墓在角里街官為建坊表曰慶流滇浙今士人所謂嚴家墳是也清族子從簡嘉靖己未進士仍嘉興籍

許爚字文叔以進士知莆田莆濱海倭艘突至爚率民兵

督戰生獲賊魁值亢旱徒步請禱即雨調鄱陽改濰縣

遷主事歷員外郎出為順慶府同知解組歸嘉興湯志參嘉禾徵

錄獻

吳國倫字明卿以祖戍湖廣興國州遂家焉生而穎異善

屬文嘉靖己酉舉鄉試第一旋成進士除中書舍人陞

兵科給事中與王世貞李攀龍謝榛宗臣徐中行梁有

譽為七才子以忤嚴嵩左遷南康府推官歷湖南參政

有甌瓠洞正續彙嘉禾徵錄參五十四卷靜志居詩話

案嘉興何志國倫祖墓在虹橋東畔有感舊詩

包檉芳字子柳與父汴同舉於鄉旋成進士知魏縣遷刑

部主事徙儀制員外郎轉郎中時高拱為禮部屬所厚

某越次充歲貢檉芳不可拱怒送不下階檉芳正色曰

尚書送屬官自有故事毋令他日言壞例自檉芳始拱

銜之左遷南直隸通州分司判官州舊有范隄歲久傾圯人多溺死檉芳築外隄以衛之名包公隄以比范隄

云移邵武同知致仕歸嘉禾徵獻錄參揚州府志

嚴從簡字仲可以進士為行人使樂安王府卻金幣不受

轉工科給事中管盛甲厥綜覈嚴密奄豎銜之令人密

割其牙牌從簡疏請另置代藩與縣官告訐奉旨行勘

從簡不直代藩藩遂發其失牌事謫揚州同知解綬歸

生平嗜書不釋卷郡守請修郡志橐就未梓有殊域周

咨錄二十卷袁志

戴鳳翔字點叔以進士授行人擢吏科給事中時海鹽潮

溢壞田廬無算議修者以費鉅難之鳳翔抗疏以海鹽

為三吳屏障無海鹽是無諸郡也遂得請條議宣劄戰

守六事又弭盜六事皆聞報時高拱當國出知鳳翔府

甫至官左遷鄒縣丞起金壇令入為刑曹會慮楚囚張

居正柄國有所屬翔不為徇出之守九江調鳳翔府尚

書陸光祖戲之曰鳳翔合得鳳翔府遷苑馬卿引病歸

袁志參嘉禾徵獻錄

王儒字汝珍篤學力行鄉邦稱宿儒正德丙子舉於鄉初

令星子再令崇陽以艱歸服闋改順天府學教授北地

鮮學加意造就弟子嚴鉉初居塞外徙置學旁教之後

成進士任本府太守儒益自重未嘗以尺一千之轉興
山令致仕歸兩浙名賢錄

王儒字修卿嘉靖己未進士知杞縣致仕歸先是分嘉興
縣設秀水嘉善二縣地犬牙相入嘉善民駕言田虧而
額浮欲更二邑田益之事聞下督撫勘議儒乃為七辨

以證之後卒如其議嘉禾徵獻錄

案嘉興何志載王儒字修卿不載汝珍浙江通志載汝珍不及修卿吳志以兩王儒合傳未詳事實今採兩浙名賢錄嘉禾徵獻錄各為列傳區別之

孫詔字朝宣以進士授工部主事榷稅湖廣遼瀋恣橫每
箝制使者詔至耿介自守不能奪人為員外郎陞郎中

卒子叔文光祿丞工詩文著書曰我鑑袁志參嘉禾徵獻錄

陸相儒字大行以進士授工部主事出知延平府首行條

鞭法為八閩倡閩人稱便又創義倉行鄉約興學右文

郡大治擢貴州副使土寇拒命時議撫議勦無定畫相

儒獨許其自新卒歸順以憂去服闋復補閩中會島寇

入犯遣材官逆於海斬獲有功以疾卒兩浙名賢錄

宗宏暹字進甫以進士知豐城縣陞刑部主事調兵部改

擢兵科歷禮垣時黃河衝決徐呂二洪險峻寶應湖有

風波之患宏暹議開徑道于徐築腹河於寶應至今永

賴值天變陳言疏請進王守仁從祀孔廟萬曆改元銜

命往祭禹廟請神抱病歸袁志

卜相字夢良以進士歷官雲南參議毋僕之亂招集流亡

儂賊寇臨安相開宥脅從因賊為用襲擒渠帥阿齊等

時制府謀出海勦蕎甸相抗論百言為民請命罷歸累

薦不起著有二氏奇事田糧議觀感錄袁志

徐學周字尚文祖瓚為廣東巡檢矢志清白民為立卻金

碑學周與弟學會同舉於鄉三舉會試副榜謁選知嘉

定州丈量令下學周首定區法全蜀倣之會建慈甯宮

命採木學周條上採木議有五難三易以不擾民為主

嘉定故行茶地商人歲以金餽守學周峻拒曰若不聞

我祖卻金事耶叩部土司嶺柏死族人阿祭與孽豎應

昇相讎殺以叛聞臺檄治之斬阿祭立其族之賢者嶺

起鳳與應昇分治土司以甯遷雷州府同知歸學會歷

知潮陽永清縣終高唐州袁志參嘉禾徵獻錄

馬如麟字昭父以舉人知巢縣救荒多策活飢民萬計巢

素苦潦築圩障湖號馬公圩調穀城晉鄖陽同知時蜀

有播之役徵餉于鄖軍興獨不乏播平推知雲南潯甸

致政歸著有正訛編亦稽錄巢陽十議穀岡八議諸書

袁志

沈伯龍字雲卿父大禮有淳行以鄉貢司訓勤於課習祀

名宦伯龍以進士為內江令有惠政時直指貪悍因伯龍內召發其行橐止俸數金直指赧顏退補禮科給事中出守川南會九絲亂有司不敢問伯龍奮然語諸從事曰人臣委身事君正在今日諸君更何待耶諸將皆奮遂自督陣親冒矢石捷聞陞俸一級時番裸作亂督撫以兵五萬專屬之伯龍謂解甲未久不堪復戰遂呼裸眾諭以國威裸歡呼動地縛三渠魁以獻仕至山東

按察使 分省人物考參 嘉禾徵獻錄

屠元沐字沂春以進士授工部主事歷郎中督儀真及張秋河道陞山東布政參政赴任去導從人不知為憲使

也轉廣西按察使益勵清節進本省布政使乞休加太僕寺卿歸杜門謝客不異寒素上聞其清特詔有司具禮存問卒年九十 嘉禾徵獻錄

高夢說以貢入京申時行嘗延為子弟師選華亭學諭後申為首揆門下士多通顯未嘗通尺一著有蕉鹿言希

白吟草 嘉興湯志

李芳字叔承以進士令曲周縣多曠泐教民用桔槔溉田高者使種木棉盡成沃壤時江陰逋賦多盜移芳治之定賦役浚桃花港白糧積欠數萬議以錢布償米題請報可各郡皆如江陰例以高等徵入尋中蜚語遷饒州

同知世居梅里有花癖詩牡丹百餘種為譜以續歐陽善山水花卉子原中以進士知溧陽為政慈和改大名

府教授遷國子助教以親老歸袁志參李氏家譜

賀道亨賦性淳樸司訓將樂待士以莊人稱嚴師致仕歸

苦節自守閉戶讀書至老彌篤年九十七卒嘉興湯志

金燿字樂泉以貢入太學授柳州通判值猺獞反側威德

竝著民安其業六載奏最竿牘不入都門久之不報遂

歸卒祀鄉賢袁志

濮淮字大川以貢任仙游學官值倭亂日夜與其令孳畫

城守賴以不潰歸為鄉飲賓年八十五卒劉志

王允昌字永叔三錫子世居桐鄉後徙梅里遂入籍中順

天榜授思州推官陞貴陽同知天啟初川兵援遼調募

失策遂據永甯以叛衛官盡降允昌自誓必死乃以印

遣吏間道歸上官賊至允昌縊死一門十三人悉受屠

戮子世駿以事聞給祭葬贈光祿寺卿世襲錦衣千戶

大清一統志 參浙江通志

朱先當戚繼光時為薊鎮參將遷副總兵後數為廣東福

建總兵官初起家武舉募海濱鹽徒為一軍自胡宗憲

為御史至總督皆倚任先大小數十戰殺倭甚眾以功

授都司宗憲被逮先解官護行宗憲釋還先乃歸御史

按福建巡撫王詢侵軍費檄先證之先曰先王公部將
也不敢誣府主御史怒坐先萬金論死繫獄閱八年始
白萬厯初用薦起厯登闈帥以年老謝事歸先爲將有
膽智砥節守公其處宗憲詢二事時論以爲有國士風
同時有王憲嘉靖二十五年倭寇入境憲以捍城勦寇
功官鎮撫亦爲戚繼光所重明史戚繼光傳
參嘉興湯志
徐軫有膂力嘉靖中有倭寇至當事募勇力士能擒一倭
者與官軫同朱先往先獲倭三軫獲二授百戶遷把總
管火器三十四年戰平湖無援被殺祀邑厲壇又有沈
應仕劉大道亦以禦倭戰死袁志

金丹少爲諸生坐事被禡倭寇嘉興主帥令將鹽兵五百
禦之遇賊先登賊繼光以爲才上之制府爲裨將授千
戶平妖賊李松於烏鎮受上賞時胡宗憲遣蔣洲入海
游說未歸募能再往者丹遂往說徐海陳東等降成約
而還授本省都司從繼光勦閩廣諸寇累遷副總兵袁志

參嘉禾
徵獻錄

王司敬諸生少問業於唐順之多膂力能以齒張弓倭至
據浮圖瞰城中司敬射之應弦墜賊氣奪凡建敵樓以

禦寇皆其議也嘉興何志

高文登字伯升平湖籍居嘉興有至性年十三以父銘誤官糧請

代繫郡守憐之臨試俾出獄成博士弟子復請繫舉于

鄉謁選得葉令值大祲委曲營賑活饑民萬餘為政務

德化置學田葉大治擢知膠州膠魚鹽藪多姦宄出沒

登一切治之以法

嘉興湯志

高應焜幼穎異以詩經領鄉薦四方爭延為師掌教湖州

有胡瑗之風晉南國子監助教陞博士轉常德同知以

疾不赴

嘉興湯志

許應達字伯漸以進士知東平州時郡守欲開水田應達

言其難行不聽後諸邑水田不効應達教民藝麥乃大

穰守志中以蜚語調遼州等晉刑部員外郎調工部司

權清江時王公堤潰守臣議開別河避之達不可堤以

石竟無患寶應河險應達議于老堤外開越河朝議難

之應達言越河成則水性順侵嚙不足患得報可達身

歷籌布四越月而河成延袤四十里費僅十二萬金又

於瓜洲創屯船塢使艘自江入得避險甃康濟舊堤免

歲修費范家口裂應達以法塞之擢太僕少卿出為參

政道治兵井陘未幾改蘇松水利發畱都帑金十萬治

水應達開吳淞七十里及諸州縣支河費減半以病歸

袁志參嘉禾徵獻錄

沈思孝字純父以進士授番禺知縣入為刑部主事張居

正父喪奪情與艾穆合疏諫廷杖戍神電衛居正死召復官進光祿少卿尋遷順天府尹忤時相被劾出為南太僕卿未幾歸復起為南京光祿卿進右僉都御史巡撫陝西召為大理卿中官郝金詐傳懿旨下獄刑部薄其罪思孝駁誅之帝悅進工部侍郎陝西織羊絨為民患思孝奏減十之四進右都御史協理戎政思孝屢乞罷內閣擬旨慰畱有才猷素著之語上親改為忠猷懋著思孝直聲高天下然尚氣好勝動輒多忤以爭察典與冢宰有隙會乾清宮災思孝請行皇長子冠禮以回天心又以日本封事大壞請亟修戰守備并論趙志皋

石星誤國與當事左遂引疾歸家居十五年卒贈太子

少保所著有吾美堂集溪山堂稟明史參嘉禾徵獻錄

李應徵初名衷毅字伯遠幼喪母事後母及後母弟盡孝

友讀書尚氣節工詩間及時事為忌者文致於罪神宗

原其無他得免舉於鄉時廷議察孝廉之實行著聞者

浙江得七人應徵首列屢上春官不第與友羅元甫同

謁選得壽春學正念羅貧困請以己職先授羅冢宰嘉

其讓許之後授臨安教諭擢南京國子監博士卒著有

澄遠堂稟子士標自有傳袁志參嘉禾徵獻錄

周從龍字彥雲父惟義為教官從龍以鄉舉選肇慶推官

擢南京大理評事不赴歸性孝友閉戶著書精研理學
有大學遵古編中庸發覆編論語蠹談孟子支言六委

釋聖等彙學者稱麟潛先生

袁志

沈堯中字執甫以進士知南陵墾荒築堰濬川瀕陂以千
百計遷蘇州同知戚友不可干以私擢南刑部員外郎
左遷開州知州不赴歸堯中博學嗜古明於典故構城
南白苾村居閉戶著書輯本郡志十年三易彙知府劉
應鈎聞之造請數四考訂成書又以嘉興縣未有志書
編燕居備覽六卷出示李少卿日華後知縣湯齊徵取
前書屬日華續成之著有沈司寇全集其他著述甚富

詳見經籍從子應斗

袁志參嘉禾徵獻錄

沈夢斗字應宿以進士知盱眙調常熟政務寬簡士民戴
之再轉知無爲州恤災清稅以勞瘁卒貧不能殮寮友

醵金以櫬歸

劉志

孫光啟字子貽以進士授刑部典銓某欲薦光啟自代托
同舍郎致意光啟辭曰薦人而使人知我不能作感恩
吏部出知惠州以忤制府引疾歸兵垣上疏白其事補
濟南直指謁廟光啟以繡衣往藩臬共訝之光啟曰謁
廟禮也方面體等耳夫何嫌直指重其氣節辭謝之尋
以異等遷秩治兵沂州轉參閩藩卒於官

袁志參嘉禾徵獻錄

包世杰字羽明以舉人教諭永康俗有溺女錮婢習世杰多方開導風遂息陞泗州知州盜殺縉紳左某世杰禱於城隍神夢以蓮花相遺乃拘其婢名夏蓮者一訊得

實以勞卒

嘉禾徵獻錄

岳元聲字之初以進士知旌德縣改大名府教授遷國子博士轉監丞有詔選良家女入宮上言皇長子冊立未舉而先盛女謁非所以教并諫用銅具鞭撻宮侍又論李長春廕子素監規一時有鐵監丞之稱轉工部主事時詔起舊輔王錫爵甫至遂奉三王竝封詔元聲憤然具疏爭之復偕顧允成張納陞等面詰首輔於朝退復

上書錫爵乃上疏自劾事遂寢晉郎中極論關白稱亂始於大司馬石星倚沈惟敬朝鮮封貢之議輔臣趙志皋墮其術中趙深銜之借刑部主事朱長春疏勒爲民里居後究心理學建天心書院熟悉鄉井利弊嘉興析縣時嘉善民倡爲正疆界之說欲割嘉興秀水田爲隱匿地元聲力持之著田糧沿革年譜三邑分縣圖籍考天啟改元起補南主事歷擢南兵部侍郎署部事會都司陸超剝軍激眾元聲杖繫以聞時魏忠賢竊政與同官陳道亨具疏劾之御史曹應瑞徐復陽阿璫意先後連劾之遂以軍變削籍崇禎初復原官卒贈南京兵部

尚書著有潛初子集等書

袁志參項玉筍
橋李往哲續編

張宏毅字慧林以舉人知廣東臨高縣居官清潔邑大疫

施藥濟之所活無算

嘉興
湯志

邱民貴字仲鄂以鄉舉知長汀正里甲清倉庾多惠政子

履嘉為禮部主事晉督儲去額外徵十七萬以乞養歸

母沒卒於喪

吳志

顧祚萬字完三由崇德徙居角里以舉人授象山教諭擢

南甯府推官攝知府事適洞獠拒命單騎諭款一境安

全以顛直忤時歸

袁志

徐必達字德夫學周子萬歷壬辰進士知太湖縣鑄鐵斛

以杜漕弊調深水奏免齊泰子孫媼黨軍籍二十六家

所至興水利築石曰湖隄民尸祝之先是溧邑改闢為

壩湖水泛濫艱於漕運疏請折漕以便民事未允行後

任操江復委曲奏之始得旨粟民誦之不忘陞考功與

給事儲純臣同領察事純臣受贓吏賄值大計日必達

進狀請黜陞太僕卿兼光祿事條陳白糧利弊十一

事悉允行巡漕御史孫居相以漕船壞不治請僱民船

濟運爭止之遷應天府尹進南右僉都御史提督操江

軍時四川有奢崇明山東有白蓮賊之亂必達簡練防

禦悉中機要遷兵部侍郎初為考功時以典察招忌遂

以蜚語中之自劾歸卒贈兵部尚書著有南州集

明史本傳

參袁志嘉禾徵獻錄

岳和聲字之律元聲弟以進士授汝陽令築汝隄以防橫

決號岳公隄歷禮部員外會本生父沒疏請終喪為人

後者得為本生給假終喪自此始出守慶遠訪趙清獻

公講學故址建書院尊擢惠潮道參政改補九江累陞

僉都巡撫勸遼天啟間起補延綏乞歸著有餐微子集

驂鸞錄弟駿聲自刑曹歷太常寺卿通政使時張差獄

起駿聲力持風顛之說不欲窮治以故見忤於東林

李樵

詩繫參嘉興何志

李日華字君實以進士授九江推官攝郡邑篆會監司以

墨敗怒日華不為援以蜚語挂議倅海州遷西華令轉

南京禮部主事疏乞終養里居二十餘年孝養備至父

沒仍補禮部晉尙寶司丞莊烈帝登極陳言佐新政旋

乞歸晉太僕少卿日華恬澹和易與物無忤能書畫善

賞鑒一時士大夫好古博物祥符王惟儉雲間董其昌

為最日華書畫亞於董博雅亞於王而兼二人之長知

縣湯齊請修縣志垂成而卒著書甚富有恬致堂集味

水軒日記諸書餘詳經籍

明史王惟儉傳參袁志

賀燦然字伯闇平湖人世居嘉興雙溪里以進士授行人

行人考滿馳封不馳贈燦然具疏乞馳贈得諭旨行人
馳贈自此始一再奉使嚴絕饋遺上疏極言礦稅之弊
晉吏曹轉員外郎以忤時宰削籍歸自號六欲居士

嘉興志

沈孚先字白生以工部主事分司濟甯協理泃河工務聞
父病棄官歸尋起分理殿工權關荊州蕭然如寒素擢
吏曹歷四司門無私謁庚戌佐察曰一清不足以盡天
下之材一濁足以概天下之不肖時以為名言著有人

材錄南白齋詩文彙

袁志參嘉興湯志

孫光裕字子長與兄光啟皆負才名以進士知建昌縣補

固始時稅璫額派固始歲輸千金民坐困光裕搜穀二
千石以抵稅額秩滿授南御史時東宮講筵未啟而桂
瑞兩王婚禮及枚卜起廢楚獄諸務俱寢閣不行光裕
具疏言之南都素苦齊庶人暴橫光裕彈治之復陳區
處宗庶事宜皆鑿鑿可行擢光祿少卿卒於官著有雷
臺奏疏廉善堂集

嘉興湯志

譚昌言字聖俞以進士知常熟有惠政邑人於虞山之崖
侵去思二字以志德調婺源邑有金竺坦徑久廢行者

遠出芙蓉嶺險甚昌言闢新嶺號譚公嶺歷陞南車駕
郎中改北兵部典廣西試督學福建不發私函試竣題

數行并原書復之聞人有來一封去兩封以為不信視
 郵筒之謠等轉參政督餉登萊濰令與遼將李信忠有
 隙兵民阻鬪東撫以聞昌言身入遼營諭以禍福傳箭
 而定朝鮮李忠弑其主島帥毛文龍為介請封號使舟
 例從登州上昌言曰弑賊不討而封之損國威拒不及
 岸乃假天津道入島帥銜之尊陪推東撫魏璫方陷清
 流島帥造蜚欸中其所屬司餉同知翟棟緹騎械棟昌
 言以不能救為恨遂嘔血致疾卒莊烈帝即位贈太僕
 寺卿子貞默貞良進士貞和承蔭貞碩舉人

袁志參靜志居詩語

鄭士奇字平子以舉人愍新城靖江教諭遷知興國縣邑

多浮額逋賦者眾士奇悉蠲除之視事八十日以耳聾

告歸民赴府懇留復給印三日納賦者如市著有松臆

老人橐

橋李詩繫參靜志居詩語

王維新字季常以舉人令光化邑居襄郟間盜賊出沒維

新練鄉勇禦捕之温水河溢疏之入漢水患始息擢南

主事織造中官車天祥以兩鬢餽發之白金也立麾去

鉤考其乾沒諸弊不少貸出守延平坐蜚語去官

袁志

李培字培之少從唐樞王畿陸光祖游以歲貢教諭上虞

新城遷知龍南縣闡發鵞湖鹿洞之旨士民愛慕之又

婁光遠以鄉舉教諭烏程後遷縣令亦多善政

袁志參吳志

包鴻達字振端世杰子以進士知湘潭縣歲饑悉力賑濟

全活甚眾邑困馬政及解運之役力為振刷有治潭紀

事錄重修湘潭縣志行取給事中未赴卒嘉禾徵錄

包汝楫字公刻以舉人教諭海甯擢知綏甯民獠錯處汝

楫至修理城堡嚴約束苗不敢為民害遷知高唐州著

有牂牁草闢言游紀南中紀聞諸書袁志

李衷純字元白以舉人知如皋縣瀕江沙壅為洲多豪家

占業貧民不敢爭乃獻田武弁以戈船收禾稼勢暴橫

衷純陳說利害事得解盜辟良金倚洲為窟追捕殲之

入為工部主事調兵部出知邵武府擢兩淮鹽運使註

誤歸衷純深沈有幹畧素游東林講學之門魏大中死

經紀其喪鄉黨稱其高誼卒祀鄉賢著有激楚齋集子

光基能詩有澹園草袁志參嘉禾徵錄

姚以誠字衷一以副榜授蒙城縣丞流寇剽掠知縣託故

去以誠攝縣事嬰城固守流民被害奔城者悉納之門

甫閉賊大至圍城十日募壯士出奇擊之賊去未幾檄

解通州急餉至通兵部復檄令解部戶部尚書侯恂左

都御史唐世濟交薦之授南京兵馬司指揮引疾歸嘉禾

徵錄

高登第字任野以貢生知鄜縣請蠲額外之徵不報乞歸

尋補汶上以疾免孫陽諸生與妻歸淑芬皆能詩袁志

沈中英字霞城以進士授刑曹擢守安慶別宿弊勤撫字

及去官地方繪攀轅圖以誌愛戴嘉興何志

胡振芳字來子以舉人授慈谿教諭遷知嶧縣移斬水流

寇聚英霍間距斬水不百里振芳早夜防禦凡九十日

寇至與戰不能支為賊所執迫降不從拔刀斫其肩氣

絕復甦舊役負以趨有門生遇之將還家未幾卒嘉禾徵獻

錄

張汝開字伯元以鄉舉歷懷慶同知修武陟修武溫縣三

城以禦流寇又王紀善以掾史授三原縣丞濬復秦時

水道成沃壤歷攝三水白水武功三縣民繪圖俎豆之

子芝封孫燮吳志參嘉興何志

屠存仁字念慈以進士知黟縣遷甯國府教授旋陞國子

助教補工部主事陞員外郎督理徐淮中河迄有成績

卒祀鄉賢孫肅

徐潘號兼之以鄉舉任學官知江西萍鄉邑有大僚倚藩

府勢甚張其子攘婪婦產上官曲為之徇潘竟斷歸于

贅郡守曰獨不為功名計乎潘曰功名止於一身心術

畱於子孫洞蠻焚掠近境潘單騎論以大義蠻孱誠款

服薦陞六安州值張獻忠亂民無完膚力加撫字授安

廬兵備道以亂歸以上嘉禾徵獻錄

高道澹號采菽少從魏大中游得其傳輯古人言行可師

法者為最樂編以恩例授南京光祿寺署丞母老請養

歸嘗箋註感應編并補刻所不及共二十卷袁志

高道素字明水原名光斗字元期文登孫道素以進士授

虞衡司主事調營繕偕太監黃用監造桂邸分界督造

邸成遷郎中未幾衡州大風雷用所督寢殿震圯詞連

道素俱逮繫衡紳劉亨甲怨道素建邸時按圖徙其宅

喉問者文致於法後子承挺上書訟寃復原官道素孝

友好義為諸生時倡建仁文書院并置義田善詩文工

書畫著有景元堂集明水軒筆記嘉禾徵獻錄

虞相堯字在欽父廷陞忠讜敢言著有雲岫山人集十卷

奏議二卷另有傳見海監相堯崇禎壬午舉人性至孝母

老陳情不赴公車孝廉終養自相堯始樞李詩繫參吳志秀水任志

湯執中以吏員選江西廬陵丞崇禎壬申粵寇入吉安逼

府城巡道蕭應坤遣執中率民勇至富田更募鄉兵禦

賊賊突至殺巡檢龍德新執中與賊遇於木湖洲奮勇

直前手殺賊藍旗手氣甚壯馬蹶墮地遂被害撫按題

敘褒卹

國朝乾隆四十一年

嘉興府志
卷五十一
三

諡節愍

欽定勝朝殉節
諸臣錄參嘉興湯志

徐世瀄字中明必達子萬厯戊午舉人會試副榜以教諭擢重慶府推官崇禎十三年改知隨州張獻忠奔突襄鄧間州嘗被陷世瀄知賊必復至濬濠塹拓羊馬牆爲外郭明年賊陷襄陽悉眾壓境世瀄登陴固守三使告急於郢巡道趙某趙不顧巡撫宋一鶴發兵來援趙又畱勿遣相持七晝夜食盡援絕城陷世瀄勒馬巷戰賊脅之下罵曰有死城州官無下馬州官飛矢貫其頤眼鼻橫斷墜馬罵不絕口死仲子肇樑抱父屍且哭且罵賊併殺之世瀄先命肇樑埋印州解後臨死呼州人告

以處後掘地得之世瀄妾趙氏王氏暨家屬十八人皆死賊驅趙不出殺所抱幼女申姑斷其八指罵益厲死之三日吳人石琳求得世瀄尸殮之趙與申姑抱不解遂并棺殮肇樑尸卒不得長子肇森詣闕以聞贈太僕少卿賜祭葬恩蔭建祠致祭肇樑縣學生贈國子助教耐祠肇森歲貢生以弟殉難讓其蔭於遺孤宏耀初世瀄罷公車在京忽心動七晝夜馳歸適父病革侍湯藥浹旬沒遺產悉讓弟姪孝悌忠烈萃於一門著有易說

春秋會編

國朝乾隆四十一年

賜諡烈愍

欽定勝朝殉節諸臣錄參
明史本傳湖廣通志嘉禾徵獻錄

案嘉禾徵獻錄載世澗又有妾倪氏城破匿免寇去求世澗遺骸得歸葬時年二十七苦節至六十餘卒與傳中石琳得尸互異存以俟考

徐石麒字寶摩以進士授工部營繕主事筭節慎庫魏忠賢兼領惜薪司所需悉從庫發石麒輒持故事格之其黨譟於庭不為動御史黃尊素坐忤忠賢下詔獄石麒為盡力忠賢怒坐削籍崇禎初起南禮部主事遷考功郎中佐尚書鄭三俊京察澄汰至公厯應天府丞時三俊為刑部尚書議侯恂獄不中得罪石麒疏救釋之入為左通政累擢刑部侍郎石麒奉命清獄推明律意校

正斷獄之不合於律者十餘章囚多寬減然廉公無敢倖免者每擢本部尚書會劉宗周以救姜採熊開元獲嚴譴僉都御史金光辰救之奪職石麒再疏畱不納採開元即下詔獄移刑部定罪石麒據原詞擬開元贖徒採謫戍帝責對狀石麒援故事對帝大怒除司官三人名石麒落職閒住福王監國召拜吏部尚書馬士英挾定策功將圖封石麒議格之中官田成輩納賄請囑石麒拒不應由是中外皆怨構之去遂稱疾乞休士英擬嚴旨福王不許令馳驛歸加太子太保明年南都亡大清兵臨杭州徵石麒不至六月嘉興城將破石麒時居城

外知事急曰吾大臣也城亡與亡由東城縋而入僕祖
敏李昇從及城陷石麒麟朝服再拜自縊於可經堂之南
榮可經者石麒麟先所題也至是其名驗二僕縊而侍有
僧真實負石麒麟尸置大櫃中石麒麟本無子恩撫族子爾
穀爲後又繼柱臣爲子爾穀三日後變服入城溽暑經
五日啟櫃儼如生握手沒爪鬚怒張焉潛昇櫃從水門
出以禮殮於嘉善縣南之楊林村舍年六十八著有可
經堂集爾穀字以之著有畫水草堂彙丁亥執赴金陵
死妻孫聞訃赴水死

國朝乾隆四十一年

予諡勝朝殉節諸臣

賜石麒麟專諡曰忠懿墓在海甯龍山餘姚黃宗羲梨洲集有神

道碑銘未立按察使司秦公瀛別爲文立碑於墓遵

欽定勝朝殉節諸臣錄
參明史家乘各文集

增錄孫功燮自紀云公本貫係嘉興縣胥山六都人世
居鍾帶鎮之晝水鄉原配顧夫人贅於武塘因有謂爲
嘉善人者初爲嘉善諸生復寄籍青浦繼娶馮夫人并
營封公墓道於松江因又有謂爲松江人者殉國後卜
葬衣冠於海甯縣圍花鎮之龍山因又有謂爲海
甯人者死難名臣不無借爲光寵其實嘉興人也

李毓新字高之自河南徙居嘉興其先世有字元白者入
籍嘉興見河南名宦孫

孟璿又入海鹽籍故
縣志亦有毓新傳以進士爲潮州推官政尙嚴明數

決重獄上官廉其才令攝四篆時惠潮流寇作亂制府

屬毓新監紀條上十二事用其議以平又建議城豐順
屹為重鎮潮俗多蠱魅有妖火毓新為文禱之火遂滅
攝肇慶事藩兵與民格鬪寇乘間竊發毓新步行勸諭
民賴以安閩寇姜世英等犯饒平大埔後先十餘戰奏
捷毓新首功行取未赴南都擢兵科給事中歸乙酉城
破與徐石麒同日死子禎先抱父屍亦死

國朝乾隆四十一年

賜諡節愍

欽定勝朝殉節諸臣錄參袁志及家乘

高承埏字澤外以進士知遷安縣縣數被兵歲饑逋賦承
埏請減運緩徵流民歸者千七百戶調寶坻邊警縣被

圍承埏登陴固守多方防禦城賴以全改知直隸涇縣
數月政成民歌曰琴溪泉潔而清岳山阜高入雲誰其
比高使君遷工部主事白父寃即乞養歸涇人奉祀於
王文成書院承埏博學強記雖簿書鞅掌不廢涉覽著
有稽古堂集

吳志參嘉禾徵獻錄

李士標字霞舉入國學以積分試上等授上林苑丞遷山
東甯海州州同崇禎壬午冷口兵入圍州城甚迫歷三
月城中食盡士標疾篤卧起城上督守益力卒於雉堞
間城遂陷妻沈率其妾婢僮僕凡二十三人同日死子
寅著名復社有視彼亭草

國朝乾隆四十一年

詔入祀忠義祠

欽定勝朝殉節諸臣錄參嘉禾徵獻錄

譚貞良字元孩昌言子少有才名崇禎癸未以五經中式

及殿試莊烈帝御書名次於卷賜進士出身第一逾年

明亡赴南都除禮部主事出典廣東試未達南都破復

由台州浮海至福州轉徙流離力疾死友人朱森朱英

經紀其喪得歸觀著有儀禮名物考狷石居遺藁子吉

璵瑄自有傳

朱羹尊譚貞良墓表參家乘

徐肇榮字拙民必達孫諸生爲文奇古崇禎丙子同考官

李清得其卷力薦元主司以過奇抑置副車詩學漢魏

有建安風格乙酉城破死之子宏炯長洲令

吳志

李白明字先修居梅會里以歲貢除揚州訓導南都監國

時淮上失守城陷自明衣朝衣遙望孝陵再拜自縊於

學舍瀕死時揮季子鳳侶去鳳侶曰父死忠子獨不可

死孝乎亦自經家人從死者十餘人自明性傲兀好飲

酒詩文有奇氣著有謫仙居藁仲子麟友匍匐往揚州

求父骨不得慟哭返終身飯蔬啜水以布衣終從子可

願性恬退工詩著有竹坪吟藁

沈進李小白傳參李氏家乘

國朝

王庭字言遠順治己丑進士從平粵東授東川府陞廣西

副使提學四川歷任江西布政補山西屬吏進謁者輒
諛諛勸以牧養百姓後乞歸庭制藝堅疑隋刻自成一
家古詩出入陶韋律得杜法晚乃汎濫唐宋諸家著有
三邑嵌田續說秋間集三仕二西諸草山西通志參
四川名宦冊
沈閔劭字子將以進士除知甯遠時湖南遭寇亂播遷殆
盡閔劭多方招集流者復歸

王師進取粵西甯遠為孔道閔劭與民約遇掠者即縛之詣
經畧立斬以徇歲旱請捐租得報可最聞應內擢經畧
知其才請授常德同知時初設四大鎮於常德屯重兵
閔劭調集芻豆日夜治簿書諸帥憚其威名戢眾不擾
以匱餉罷歸卒袁志

沈子漣字來赫以進士知白河縣時餘寇未平子漣晝夜
防禦以勞瘁卒於官嘉興何志

莊璘字玉侯官平陽教諭後以進士為都水主事督河張
秋治沙灣決口著有沙工紀畧安平患澇賑活饑民無
算分巡汝南時量田令下璘止釐其匿稅者民不病吳志

李明整字山顏梅里人少著名復社流寓閩嶠遂以福建
籍中舉授古田教諭以興復禮教為己任時遼陽佟國
鼎巡撫八閩延掌書記有流民數千入福州境佟疑其
寇也將悉寘諸法明整白其寃得釋歸里以著述終身

嘉興府志 卷五十一
嘗入蘇門山與容城孫奇逢辨析理學宗傳頗相推重
著有樂志堂詩集

吳志參樵李詩
繫李氏族譜

譚吉璉字舟石幼隨父貞良入閩遇寇以身衛父寇擊之
不去曰孝子也遂舍之康熙初以上舍考第一授中書
出爲榆林同知會滇蜀用兵上官檄吉璉轉餉入蜀至
甯羗州遇亂巡撫撤饗還棧道路絕吉璉間道從黑水
峪七晝夜達盤屋定邊副將朱龍反直逼波羅堡堡距
榆林百里監司高光祉問計安出吉璉具畫利害狀光
祉是之聚士民誓神死守募壯士立忠義大會編什伍
明號令畫障而守吉璉出私財以享士宿城上晝夜防

禦民賴以安綏德周繼明聚眾數千入神木與叛將孫
崇雅合攻陷延安榆兵迎戰不利城中偶語籍籍欲出
降光祉夜呼吉璉曰事急矣鎮兵疲不足仗奈何吉璉
奮髯大呼曰死譚吉璉職也出諭士民曰忠臣我與高
公爲之豈責若輩死然所以死守者正爲若輩計耳賊
一入子女玉帛皆賊有且若輩今日降明日大軍至無
噍類矣眾泣且拜曰公言是光祉出千金吉璉益以數
百金間道渡河買粟於保德河曲以兵突圍衛之入人
心始堅

王師至圍始解而響水清平鎮羅諸堡猶爲賊保聚吉璉單

騎諭降之馳至神木檄崇雅繼明曉以禍福遂以眾降

事平上功加一級久之調知登州邁疾卒吉璉好學工

文章在榆林修延綏志又著肅松錄爾雅綱目一百二

十卷嘉樹堂集二十卷鴛鴦湖權歌一卷 浙江通志 參吳志

譚瑄字左羽吉璉弟康熙己酉舉順天鄉試歷禮垣楚省

兵亂上官皆新除道遠未至瑄疏請以在京官速赴任

董之又六計弊吏年老者多以廣文充數瑄疏言貢士

需銓時年老甫得官而復以老去請勿効著有涵萬樓

疏橐營祖阡為世墓圖說子有年丁卯舉人歷知靈寶

江甯縣 吳志

高以永字子修以進士知內鄉縣崇學校招流亡均賦則

免私派陞安州知州歲發常平倉粟以賑州西有白洋

淀水涸民種麥於沮洳中旗弁誣以侵牧地訐上官以

永曰淀偶涸為地指以為牧他口水盜必移指他地是

害民無已也因議請大會兩後復浸事得寢擢戶部員

外郎以勞勩卒於官 吳志參構李詩 繫河南通志

王燮字子和以進士知阜城縣縣劇驂不以供億病民擢

吏部主事弟熒山陰訓導亦知名又姚原瀉以進士知

任邱邑患盜計擒其魁徵賦不入署盜至惟帛數束而

已 吳志

朱振字干仞以進士知舒城縣邑遭寇躡振均賦役嚴保

甲勸農桑興學校師征武昌道經舒城振令悉陳市物

於庭平價鬻之兵不擾舒有七門堰溉田二千頃壅塞

已久下流苦旱振考舊志排眾議卒興其利淮南諸郡

種雜糜芑新令紅白分貯民病檢納力請得如故夏旱

請減賦蝗不入境後攝六安裁革耗羨民咸德之以旱

步禱致病卒著有龍舒治畧吳志參伊志

虞兆清字鑿斯康熙己未進士知四川綦江縣當兵火後

邑民彫敝兆清招徠勸墾戶口日增攝忠州修陸宣公

墓又以公及劉租庸李鄴侯白太傅竝吏南賓建四賢

祠明楊應龍之亂綦江守將死者房嘉麗張良賢亦祠

焉以廉能薦授湖廣道御史著有素業堂文集蜀行草

弟兆澹字虹升有詩名著有軒渠集天香樓偶得吳志參構

李詩繫

張時雍字問樵康熙甲戌進士為漢陽令歲大饑捐米百

石為倡設粥廠賑之男女異處率僚屬親自檢閱其在

遠鄉者擇紳士監之又設官渡四艘以濟飢民全活無

算柚堂續筆談

李我郊字約山明愨子由廩貢起家歷鞏昌同知時

王師征準夷委辦軍需自陝抵口外期甚迫我郊獨任之不

旬日而事集擢工部員外郎遷兵部分巡永甯值土番
跳梁剽掠內地我郊捐資贖回良民以萬計轉廣西蒼

梧道卒於官

伊志

李陳常字嶧山亦明熬子以進士授刑部主事轉員外郎
時借帑獄起積案累累大司寇知陳常有幹畧委與高
安朱軾同心勘實開釋甚眾遷郎中出知鳳陽擢兩淮
轉運時鹽多積滯商力漸絀陳常革陋費示節儉課額
無虧巡視兩淮鹽政與張鵬副趙申喬張伯行諸人稱

十廉云

吳志

高孝本字大立以永子三歲時指氣字曰此即浩然之氣

也長而研經酌史發為古今文妙合軌範以進士選知
涇縣再補績溪兼委歛篆以廉直聞罷官時士民攀輪
留之孝本作詩甚富由登岱以迄游台蕩諸山凡十七
集游而益進晚歲自訂因哉叟未刪藁外存古三都賦
雜賦二卷愚夫論二卷游記二卷家傳一卷

浙江通志

陸紹琦字景韓少能文約己和物粹然若成人少孤資課
讀以養母康熙己丑成進士入詞館由檢討累晉侍讀
終太常少卿凡與文字之任者六以忠勤奉職在位無
赫赫譽而尤悔蓋寡其為廣西學使也卻田州土司餽
金遠邇敬憚有從來第一學政之頌嘗憫粵西去中土

遠夷獠雜處不能徧悉功令搜罪至死迷不得悟既遷太常乃具奏諸生宜講習律令意爲粵士發也得

旨通行著爲令等致仕歸手書遺訓付子言平生不妄交一人

不妄爲一事不妄取一錢聞者信之

吞松閣文集

錢陳羣字主敬號香樹世居海鹽陳羣始占嘉興籍少貧苦父綸光嘗游學母陳教誨之事詳賢母傳年十八游京師結交皆老蒼名籍甚康熙辛丑成進士雍正中以編修典河南試爲陝西宣諭化導使歷侍讀學士充

日講起居注官督學順天人直

內廷乾隆初擢右通政母喪服除仍視學順天累官刑部侍

郎充

經筵講官會試副總裁兩典江西試以疾歸

高宗純皇帝南巡加刑部尙書太子太傅

特予在家食俸赴京兩祝

慈釐與香山九老會年八十九卒於家

賜金

諭祭葬贈太傅諡文端入祀賢良祠陳羣外和內厚每以汲引

人材爲己任立朝持大體而遇事侃侃不少借在刑部

每事必虛衷詳鞠有大臣某觸法下獄

上怒甚吏欲從重擬陳羣持不可卒如律請自起家以文章受

嘉興府志 卷五十一
知遇致仕後

上巡幸所至及秋獮行圍凡有

御製輒寄令陳羣和手錄以進賡颺之盛無與比而生平忠悃

自矢尤邀

天鑒屢荷

賜詩褒獎稱以頌不忘規蓋其敷陳多在密勿之地卽家人不

知也他如推原律例條陳耗羨事宜請頒從祀先賢先

儒兩廡位次停科試舉報優劣旌受封節婦修明思陵

等疏皆其表白者也著有香樹齋集行世

伊志

汪爲熹字若木以歲貢補桐廬訓導縣之學宮面江水溢

將圯爲熹捐俸葺新之桐君山下分水處往來病涉設

渡以濟歲祲出貲助賑并置學田給諸生之貧者秩滿

知鄱陵縣行保甲法姦匪斂跡嘗延同里戴源瑞蒐輯

故實同纂鄱陵雜誌若干卷補前志所未備

伊志

錢界字主恆陳羣弟以陳羣保舉發陝西歷知醴泉寶雞

吉水廬陵等縣擢知歸州攝蒲圻以施南府同知卒於

官界所至有惠政不名一錢卒後囊橐蕭然歸櫬過江

西人皆號泣以送蒲圻之民至今立祠祀之界工繪事

得母陳之傳與同郡張庚竝稱

伊志

戴源亨字通也以進士知湖北嘉魚縣境有堤工水勢衝

決源亨日夜堵禦堤以鞏固調天門以廉能稱致仕歸
購宅素園著有稼邨集兄源永以舉人知文水縣改永

嘉教諭

伊志

陸樹本字豫立紹琦子乾隆丁巳進士以編修歷充經史
宗學等館記名御史致仕歸樹本少承家訓績學砥行
爲士林表率主駕湖書院講席二十年書院舊祀陸清
獻公樹本奉爲依歸每接弟子必舉清獻立身行己以
勸勵之盡心校課士論翕然院舊有田不足供膏火樹
本首捐貲當事者各分俸以助先後益田若干畝沒後
卽從祀清獻於書院生平善氣迎人表裏如一周郵宗

黨不倦鄉里稱之

伊志

沈瑄字琢英登會試明通榜以知縣發往甘肅歷署伏羌
鎮番鎮番民與武威爭紅水河利武威地高築壩而下
流涸鎮番田不治瑄作武鎮紅水河辨詳著之調補崇
信邑倚山臨水水齧城根歲久將陷瑄相度形勢悉心
修築制府明山以城功第一稱之

伊志

馮渠字暎清以進士知靖安縣值歲祲不待報發倉穀以
賑被劾罷官貧不能歸爾主濂溪書院卒於章貢渠文

學駭洽工詞賦著有文選牖蓼園詩

梅里詩輯

錢汝誠字立之陳羣子乾隆戊辰進士以編修典河南試

直

內廷充

日講起居注官屢擢侍讀學士旋陞內閣學士時閣學未有缺汝誠以待補得食俸尋轉兵部侍郎故事新入部者居右奉

旨着補左皆異數也復改刑部初陳羣任刑部令汝誠侍左右案有疑相與推原律意必得當而後止故汝誠居是職有裁制持法明允稱

上意已兼順天府尹改戶部仍兼刑部凡

車駕所至皆參扈從備顧問兩典江南試以乞養歸服闋後補

原官充四庫三通館副總裁未幾卒

伊志

錢汝恭字雨時陳羣次子乾隆丁卯舉順天試挑發江南補流陽令流有六塘河每暴漲城之西門當其衝屢搭屢圮汝恭審地勢開支河以殺其流又闢柴米河以通舟楫縣東有窪下土田不治民多逋賦具牒極言其累得減額又縣民輸漕無水路艱於運請改民折官辦流人便之既去入名宦祠調興化清積案百餘邑多盜爲嚴立賞罰使互相訐發得免罪未幾擒其魁餘黨悉散等調丹徒以艱歸補新鄉縣縣瀕河自康熙間河決有壓廢田三百餘頃責虛糧於富戶爲民病者六十餘年

汝恭勘得實力請上官奏豁之民立祠縣之趙村以祀

擢安慶同知以父喪哀毀致疾卒

伊志

姚晉錫字安伯以庶常散館授部主事官刑部十餘年決

讞平允擢御史陳奏直省佐貳官不得陞本地州牧教

官不得閱本地郡邑試卷部議允行以母老乞養歸生

平甘淡泊杜門課子祖遺田悉推以贍族人戚黨賴以

存活者甚眾及卒告其子曰盡其道而死者吾得正而

斃焉著有閑家述要蘆涇集

伊志

王元啟字宋賢以進士知福建將樂縣甫下車即濬溝渠

清訟獄嚴保甲端士習諸政畢舉視事僅三月被議歸

厯主講席三十年弟子經其造就以學行科名顯者甚

眾生平根柢之學以宋五子為宗古文原本昌黎說經

尤精於易著有周易講義史漢正譌韓歐記疑校正經

傳沿革例祇平居士集諸書

伊志

沈祖惠字岷望世居吳江入籍嘉興寄姓李乾隆壬申鄉

試第一禮部試列第二選知江西高安縣慮囚鄰邑昭

雪死罪數人有循聲以呈誤改教歸生平敦孝友勤苦

積學講學姚江修餘姚志三人秦著秦游草西征賦為

文原本經史至今傳誦刊有虹舟詩文集若干卷四書

講義二十卷子榮河能文早卒著有龍山遺文

伊志

陸昌祖字駿聲樹木子乾隆丁丑進士知大埔縣縣有大
小姓之別小姓苦徭役每詭附其田於大姓有某乙田
在某甲戶下甲執其糧冊姓名欲奪之昌祖得其實斷
歸乙因令民各正其籍弊遂革歲饑先發倉平糶乃上
請鄰邑仿行之所濟者眾攝揭陽揭陽輸賦多折色其
價輕重不齊昌祖平其價令民概從輕者納民德之以
艱歸服除補通海地當孔道向用夫馬派之民吏緣爲
姦昌祖捐俸供應不以累民陞順天府通判攝治中乞
養歸晚主鴛湖講席孜孜以勤學植品爲教一如其父
著有柳塘詩藁

伊志

李集字繹初以進士知鄖縣少潛心儒先之書學使者雷
鉉謂之曰當爲正學中不朽人物在鄖多惠政築陂池
焚妖木邑人頌之有風烈何殊陸清獻神明已逼鄭山
公之句晚精經學著有周易願學編尙書信古錄毛詩
無邪訓孝經玉律六忍居詩文集子旦華字憲吉優貢
生弱齡應童子試亦見重於學使取其經解卷冠一郡
曰秀才中無是人也後學使竇公光鼐稱其學問第一
貢成均年僅二十九卒著有周易象義十六國世系表

青蓮館藁

伊志

金蓉字衡一梅里人少穎悟工詩乾隆己丑成進士入翰

林充三通四庫全書纂修官先後分校書二百四十餘

種晚歲家居築聽雨軒林泉自樂著有青岳詩藁湄莊

詞鈔紅香館詞選

伊志

錢開仕字補之汝恭子年十二賦游金焦詩出語蒼老為

族兄載所賞乾隆己酉成進士以檢討典貴州陝西試

充會試同考官視學雲南以勞致疾卒於官著有靜讀

齋詩集

伊志

錢汝豐字後之陳羣第五子由縣丞升榮澤縣築高家堰

壩工與眾同甘苦官至雲南儲糧道署按察使讞決多

平允嘉慶十四年改工部郎中年七十乞假歸弟汝弼

官江西巡檢晚歲家居以詩酒自娛著有灌園詩草八

卷弟汝器乾隆乙酉

欽賜舉人官陝西武功縣知縣倜儻好義有丹甌居士詩鈔一

卷詩餘一卷

于志

董源字星來乾隆癸酉舉人黃平州知州自守廉多善政

江南有第一清官之名年老歸田所著詩文集俱佚

于志

錢楷字宗範乾隆己酉會元傳臚改部曹官至安徽巡撫

廉清自守每多德政惠及黎庶卒於任所兼善分隸工

畫山水得麓臺石谷神髓著有綠天書舍存草

于志

孫鉞號次鶴乾隆辛卯舉人補甘肅兩當知縣政蹟徧輿

頌堵禦賊匪不辭勞瘁因病回籍年七十卒于志

錢復號蓉裳由府經歷分發福建歷署建安羅源等知縣

後擢升畿輔首邑居官三十年多惠政聽訟決曲直兩

造具服即判贖尾所至無留獄泣任吳橋縣學圯即捐

俸修葺有范姓逋賦者拘之至以文忠公後裔代為輸

納治事精勤吏胥備數無所事勸水災驅蝗不辭勞苦

以此得疾告歸治所之民有甘棠遺慕焉于志

錢臻號潤齋陳羣孫汝誠子由議敘揀發副指揮陞至江

西山東等處巡撫當秉臬時比較重輕一字不苟下閱

官書往往至漏盡未息尤嗜呂新吾呻吟語以為有體

有用之學其生平得力在此卒年八十有六于志

馮馨字凝之光熊兄子自少儻有才畧弱冠後隨侍叔

巡撫任諳習治術由南河主簿陞署清河知縣值淫雨

連旬淮水驟漲邑故無城以隄為保障水將平隄居民

驚竄遂募夫旨雨搶築凡三晝夜增高隄五尺廣二千

餘丈水勢稍平得賴以安歷署溧陽清河以減壩大工

告竣陞署高郵知州遇洪澤湖盛漲溢入高寶奉檄開

放三壩獨議祇開一壩以資宣洩下湖州縣民田廬舍

得免淹浸保全不少陞通州直隸知州重學校興文教

濬溝洫凡涉疑獄悉心推鞠平反使無冤抑民皆悅服

署徐州知府旋以年老歸于志

馬璉字東亭康熙年拔貢生由處州府松陽縣學教諭保舉知縣令安徽巢縣在任汰減民夫修理浮橋革除銀匠均有德政詔勒石監立解任時有巢湖輿頌一册相國張公英序于志

魏攀龍號松濤少好學肆力於詩古文詞乾隆丙子舉人已丑科中書歷官江西進賢信豐知縣署南昌九江府同知代理通省督糧道事務精明渾厚所至多政聲于志

沈可培字養原號向齋竹里人乾隆壬辰進士令安肅有惠政遇水災實力辦賑民有無米不到百姓口無錢不

到百姓手之謠宦歸主山東濼源書院學問淵博著濼源問答為有用之書子銘彝字竹岑文名藉甚生平勇於為善于志

錢豫章字培生汝恭長子乾隆丁未進士補戶部主事升郎中官部曹才年兼辦軍需遇事細核分別準駁宦歸行善置田十畝為掩埋貲嗣子希憲至今遵行不怠于志

錢福胙號雲岩汝恭子乾隆庚戌進士由編修官至侍讀學士充同考官二主試二督學一持躬嚴毅多所成就著有延澤堂詩鈔文鈔覆瓿集各一卷芸館集四卷奏

御存彙一卷真珠船二卷于志

朱階吉字慶長嘉慶丁丑進士弟達吉先捷春明報者至帖泥金命虛左以待樓居讀書去其梯閣三年獲雋先後均以第二人登榜禾人豔稱之由編修提督廣東學政以勞瘁卒於官著有覺世真經訓解圖說晨葩書屋詩賦行世于志

朱達吉字春衢嘉慶甲戌進士由庶吉士改江西東鄉縣知縣陞內閣中書補軍機章京時值回疆張逆不靖軍書旁午勤瘁尤著因克復四城元兇生獲照軍功例議敘由部郎授御史放廣東督糧道歷充方畧館協修纂修戊寅江西鄉試同考官戊子辛卯順天鄉試同考官

癸巳會試同考官前後四佐文衡所得多宿儒名士年六十卒於任于志

沈品蓮字根玉以選拔授處州府訓導葺廟廡浚泮水俸錢不足家取給之聚生徒講學最行以疾歸于志

沈維鑄字鼎甫少綦貧從父叔埏經訓堂藏書富招就塾早績學登嘉慶辛酉賢書聯捷入詞垣授編修充文穎館國史館協修乙亥入直懋勤殿補國子監司

業升侍講轉侍讀丙子督學湖北刑程氏讀書分年日程式多士壬午典試八閩旋視學時值拔萃科先期擇尤調省月三試所取皆知名士經濟如林文忠伉直如

陳給諫慶鏞均出秋試門下戊子順天學政壬辰安徽
 學政甲午仍留皖任提倡正學校刊張履祥年譜陸世
 儀思辨錄培植士林人入潔清自矢戊戌因重聽乞假
 成廟垂詢是兩耳俱鳴還是一耳後湯金釧入值猶蒙垂問維鏞
 回里與否丙午以工部侍郎致仕歸三十餘年居清要
 掌文衡內行謹嚴外觀和霽分校典試絕苞苴禁請託
 宦橐蕭然歸惟書籍主講杭州敷文松江敬業書院脩
 脯度支仍若寒素居鄉望重後進來謁必肅衣冠見之
 已酉日覩水災恫卹民隱寓書巡撫吳文鎔奏撥賑項
 迨國帑下頒已於六月棄世不及親見矣卒年七十二

入祀鄉賢祠年譜

錢儀吉字藹人文端公曾孫父福昨官侍讀隨京邸十二
 歲效選體作山賦干言前輩張問陶擊節稱賞登嘉慶
 辛酉鄉榜戊辰成進士庶常散館授戶部主事升刑科
 給事中遇事無徇庇人憚其丰采逮改官御史科吏拊
 掌曰錢公去此吾屬無患矣性耿介稽察戶部捐納房
 會堂吏郭坦舞文補監照事覺懼竄諸法請託百至峻
 拒之迄庚寅因公累鐫級絕意仕進竝焚入臺時彈章
 諫草謂人臣以封事入告不宜流播人間主講粵東學
 海堂河南大梁書院定季課章程治經講求故訓著經

典證文說文雅厭流覽乙部以章武偏安暨大業末造
典禮缺如撰三國晉南北朝會要讀史尤詳地理甄錄
魏吳都城金墉城圖之類無慮數十百篇仿焦氏竑徵
獻錄哀集 國朝文集千餘家節錄名人事狀輯先正
事畧病徐乾學通志堂經解采摭未備搜羅宋元來說
經家彙經苑一編舉比數十寒暑有仙蝶齋藏書所自
謂吾之長技但可鍼灸文字耳從弟泰吉親得師承故
乾嘉後論文章家數咸推嘉興二錢云所著文曰颺山
樓集衍石齋記事彙詩曰傲詩閩游澄觀定廬刻楮旅
逸各集 節泮士蘇源生撰次
遺事及錢氏行狀

錢泰吉字警石父復令直隸大興縣決獄慈敏有隱德泰
吉由廩膳生援例授海昌訓導卽棄舉業就冷官益喜
得遂讀書樂公餘輒假人善本校勘數過著曝書雜記
自道所得成一家言肆力古文詞與從兄儀吉咨詢學
術動輒千言輯海昌備志學職未入考有功文獻秉鐸
二十餘年嚴身教整士習臨去為州人攀留主講安瀾
書院感化海孺樂親晨夕以宗族代有聞人纂清芬世
守錄追述祖德條舉件繫逮庚申粵事起仲子應溥時
佐湘鄉節相戎幕迎養安慶念切鄉關疾革時猶以不
克歸省先塋為憾著甘泉鄉人彙二十四卷長子炳森

原名銘恕道光甲辰舉人景山官學教習前卒有邵農

偶吟稟 湘鄉曾國藩撰墓表馬平王拯撰傳

李超孫字奉墀乾隆乙卯舉於鄉剖析經義尤深於詩著

詩氏族考授會稽學教諭訓課諸生仿雷氏鉉學規條

約七十後告歸伊守湯安聘修郡志兼任校讎之役 沈

蓮詩話見梅里詩續輯

李遇孫號金瀾嘉慶辛酉優貢生淹貫經術撰尚書隸古

定釋文晚年官處州府訓導著括蒼金石志金石學錄

天香錄芝省齋詩文集武康徐能飛稱其詩風懷澄淡

梅里詩續輯

李富孫號薌泚嘉慶辛酉拔貢與伯兄超孫從弟遇孫有

後三李之目湛深經術所著七經異文釋周易校異集

解贖義漢魏六朝墓誌纂例鶴徵前後錄曝書亭詞注

說文辨字正俗均膾炙藝林詩古文詞刊有校經廡集

蒐輯長水掌故續纂梅里志附楊謙原書後尤有碑文

獻云 梅里詩續輯

沈寶麟字紱齋嘉慶戊午舉京兆試道光丙戌大挑知縣

改就教職選湯溪教諭學有武生葉某被豪富訟葉直

而豪枉上官七檄令褫衿卒持正論不過枉人罪廩生

某病狂其父得錢於待廩者為請給衣頂勸以父子天

性母為利昏疾瘳均感悔兩楹之間皆躬親洒掃雨則
省視漏痕繕完乃即安嗣以衰頽恐拜跪失儀為大不
敬乞歸主講泰州書院州牧議增院租以裕膏火力阻
之謂教士以學道愛人為他日臨民用可先示以剝民
自裕平乃罷議居恆辨別義利躬行實踐著祠倉議南
汝光水利志苟爽易圖說入祀湯溪名宦祠甘泉鄉人稟
馮登府字柳東嘉慶戊寅順天舉人庚辰進士以庶常改
授江西將樂縣知縣不兩月因親病解綬去服闋教授
甯波大吏復重其才將薦舉力辭之生平劬書媚學著
述等身阮宮保元徐侍郎士芬李宮贊泰交皆文字至

交為刻補考三家詩異文釋金石綜例論語異文疏證
其自謝詩有新書難得故人刊之句詩宗金風亭長坐
詠勺圍寒缸暑簟或吟轡所至兼喜倚聲尤熟掌故中
年游閩修鹽法志福建通志名震海嶠間所著玉堂分
韻南劍種花勺圍海嶠學易庵等分十集孫名柳孫諸
生庚申遇賊投水死梅里南王家兜闔家殉難集拜竹龕詩存
各序

吳雲翰號彥冲歲貢生專精註疏有叩疑義者令自標章
句若射策帖經然翌日乃條舉件繫答無贖義每酒酣
議論風發否則覃精研思竟日呐呐然山陽汪廷珍視

學至禾試河源考以宿學器之晚益貧出手輯經解本
 易米猶鈔簞勿輟禾中記誦淵博若馬應潮九經古義
 注王廷桂儀禮義疏酌要錢棫摘錄註疏皆皓首窮經
 而融貫漢唐說經家者推雲翰為首

錢泰吉曝
書雜記

李穀字介石嘉慶初元以廩生保舉孝廉方正兩判肱母
 金愈父淫疾不瘳呼號擗踊後有道者輒蹙然曰子勿
 言我未讀鄆人對耳境極窶不易介餘姚令聘閱文峻
 卻重金請託者客授歸恒舉嘉言懿行與家人言閨門
 感化多貞烈事性愛竹畫師竹圖以勵志書法褚河南
 晚書一目猶伏案作細楷纂成人海韻編

錢泰吉
撰行狀

張廷濟字叔未父鎮力學不仕手輯唐宋名人為天爵周

行錄入義行傳廷濟少親炙海鹽吳懋政學有根柢領

嘉慶戊午省解屢躋禮闈遂結廬高隱以圖書金石自

娛書法米南宮草隸獨出冠時所著桂馨堂詩樸勁典

核建清儀閣藏皮古器古香溢翰墨間居近竹林耆舊

書畫搜輯成編故老零落各賦感逝晚年眉長徑寸與

阮元合摹眉壽圖泐石平生德潛行芳科名若傳家物

子慶榮領道光丙午鄉薦後謁儀徵相國豔稱小解元

有稻香樓稟孫晉燮廩膳生踐履篤實遭亂後入趙景

賢軍派督水隊歿於舟次事載忠義錄

長白瑞元順
安詩集序

吳昌壽字少邨儀狀魁偉飲啖過人微時通曉畫科算學詞章訓詁亦冠絕時流通籍後斥爲末務咸棄去畱心兵事講究方畧道光丁酉拔萃貢成均庚子登賢書乙巳成進士以知縣分發粵東其初至也治劇盜卽著威名由陽山令署連平州以治英德土匪功陞直牧擒高州凌匪功保知府在韶州府任剿辦帽子峯會匪調廣州府先是州被夷擾檄昌壽守外城洋酋秋毫無敢犯至是益讜慄晉攝糧儲道繼署南韶兵備道甫任事韶屬仁化樂昌等縣爲賊陷將趨韶會總督勞撫軍耆各籌進兵路意齟齬以昌壽主督議忤意指耆故尅期五日以相難乃急視師捷聞裁四日耆始神之保授本省按察使旋擢布政使未匝年奉

命撫鄂鄂乃豫捻粵髮蹂躪地警報踵至趨隨棗鍾京部署撫定 朝命趣出省督兵直抵豫境旋卽移節汴梁會僧邸捐軀曹州卒潰沈幾應變近守遠攻旋以甄別保舉 呈吏議卒荷

主知鐫一級以去

賞假回籍修墓卽家拜授粵藩促裝啟行

又奉

旨署撫粵西履任兩月以憂勞卒性方介居官不樹黨援雖以文學進身而屢膺闔寄數著戰功論者尤偉其韜畧云

同治年奉 旨入廣東名宦暨本籍鄉賢祠行述

沈濤原名爾政字西雍幼有神童稱未冠領嘉慶庚午科鄉薦知江南如皋縣事權守燕北各郡有政聲顧軀幹短小報最入覲坐久不調援例以觀管指發江西歷署鹽法糧儲會粵事棘隨巡撫張芾嬰城拒守四十九日解圍後授福建興泉永道未到官改發江蘇病歿泰州生平學尚考訂兼嗜金石與歸安吳雲最結契賞鑒所獲輒繪圖徵詩倡和成帙著作已梓行者曰匏廬等集

新纂

朱其鎮號九山父萬均號漁珊庠生精楷法嫻吟詠與配

孔氏家門倡和吳文溥南野草堂詩話謂有對寫烏絲

同吟黃絹之樂其鎮稟慈訓早食餼中道光辛巳舉人

己丑進士由編修轉諫垣授甘肅鞏秦階道權甘肅按

察使查辦番案因公窒悞逮入京獄未竟而卒先是道

光乙未典試滇南搜閱遺卷多所甄拔兩充會試同考

官得士如林鴻年張亮基莊受祺段大章陳壇伍輔祥

崇保皆夙著聲譽書法出入晉唐晚年尤嗜顏柳著有

木天楷則滇南紀程錄新纂

沈攀桂字蟾客品蓮子以諸生力行善事道光初鄰邑震

澤縣野貓洞口風險擇要築三墩以捍行舟因有費姓

委員督辦遂讓功焉至今名費公墩募修石門至平望百餘里斷岸先是永新一帶十二年中淹斃六十餘人修築後遂成坦途民不病涉焉郡守欲詳請優獎固辭乃止好誦格言著有拱翠室詩文集新纂參耐冷談

許樸字蕙騰父鎬乾隆甲寅舉人嚴州府教授樸嘉慶己卯登賢書大挑掣授河南沈邱縣知縣丁憂服闋改選貴州天柱縣升定番州知州咸豐庚申在永甯州督帶國防每臨陣佩劍攜鳩示以死志至重午日城陷被執受戕由貴州撫臣奏請優卹加贈道銜新纂

程夢字梅巖道光辛卯科舉人與人無疾言忤色瞻親族

賻死喪賑偏災凡邑中善舉捐貲倡率所居鄰春波坊米市哀多益寡悉心經畫羣推有道長者新纂

錢繼文候選國子監典籍寓居江甯督辦團練城陷闔門殉節

賜卹埭祀江甯嘉興昭忠祠浙江忠義錄

褚熙昌字九衢道光辛巳舉人甲辰挑授四川知縣署雲

陽理鹽井興書院創團練嚴緝捕咽匪不敢入境任鹽井教民蠶桑召農婦入署示以飼葉繅絲之法報最補

定遠未履任卒平時講求學術經濟有詩春秋集解讀易偶得海防得失考西域雜說快綠軒詩文彙新纂

褚長春字菘隄高士廷瑄五世孫幼失恃父鵬飛增廣生
 誓不再娶挈子就館教以義方長春登嘉慶庚申鄉榜
 戊辰大挑授武義教諭不就卽以故曰教官職在訓士
 邇不率教者緣事入官縣令或徑拘攝不關白爭則傷
 寅情狗則虧師道不如守拙為愈道光癸未經理水災
 賑獎絕惠孚巡撫帥承瀛考覈稱最將請敘力辭之仍
 頒額旌其門好排解里黨不平事懲漕蠹苛斂挺身為
 難不避憎怨邑人賴之子志鴻歲貢生亦以文雄於時

黃安壽
撰墓表

沈亨惠號慕琴道光辛卯副貢庚子舉人均北榜由教習

知縣籤掣廣東咸豐二年攝三水縣事四年粵匪東竄
 省垣被圍三水適當其衝亨惠聯絡紳團守禦甚力手
 編三水守城紀畧擢州牧七年佐廣州府吳昌壽督剿
 北江大灣藍山等處賊巢歷著勞績補南雄州官至知

府新纂



嘉興府志

卷五十一

嘉興府志卷五十一

